

三師部

三公 大師 大傅 大保

三公部

大尉 司徒 司空 開府儀全三司 特進

省宦部

尚書省 尚詹令 行尚書省 中詹省

行省 中詹令 左右丞相

事文新集

1加3  
160  
238



160  
38

北京書局  
學校圖書

利  
268  
43

新編古今事文類聚新集卷之一

南江富 大用 時可編

金陵唐 富春 子和刊

三師部

三公

歷代沿革太師太傅太保古官唐虞有百揆之職即三公殷太  
甲以伊尹為太保紂以箕子為太師周成王立太師太傅太  
保為三公少師少傅少保曰三孤以貳之至是始有定制二  
公之職論道經邦燮理陰陽然未嘗備官周禮有六卿無二  
公周公以冢宰兼太師則三公止為兼官而未嘗有專職可  
見矣秦不師古以丞相御史大夫太尉為三公漢襲秦舊泉

乎間以大司馬大司徒大司空為三公復置太師太傅太保始尊師傅位在三公上謂之上公後漢魏晉江左因之後魏特尊太師太傅太保為三師非勲德崇重者不居而三公則魏晉之舊也此齊因之後周遠擬周制置三公三孤以為論道之官隋唐復依魏晉之法置三師三公二師不主事三公參議國之大事置府僚無其人則闕宋初無所改政和二年詔司徒司空周六卿之官太尉秦主兵之任非三公太尉司徒司空並罷依周制立三少以貳三公紹興復置太尉於三少之下元以太師太傅太保為三師太尉司徒司空為三公漢唐舊制也三師師範一人儀刑四海三公論道經邦燮理陰陽

群書要語立太師太傅太保茲惟三公論道經邦燮理陰陽官不必備惟其人書周官坐而論道謂之三公禮冬官朝士掌建

邦外朝之法面三槐三公之位焉禮秋官保保其身體傳傳之

德義師道之教訓此三公之職也前漢賈誼傳三公者內與王

論道中參六官之事外與六卿之教地官鄉老注王之三公八

命及其出封皆加一等春官上公九命為伯同上上公之禮執

桓圭九寸纁藉九寸冕服九章建常九旒樊纓九就貳車九乘

秋官公佩山玄玉而朱組綬記王藻鼎折足覆公餗注知小謀

大不勝其任也易鼎卦三公者何天子之相也公羊三公總方

而議則天子恭已而已矣荀天設三光以照明天子立三公以

明理且寬論三公銓時論道袁宏名臣贊三公者百僚之奉萬

民之表也漢詔三公天子之股肱也崔寔政論

**詩句**三公運權衡李白三槐老更茂東坡蟬冕三公府山谷三

師禮數重后山一為公與相潭潭府中居韓明君越義軒天老

坐三台李白五雲多處是三台杜五嶽祭秩比三公韓文衡山

公望冠巖廊唐楊巨源詩鍾鼎勳庸大山河誠誓長道協陶鈞

力恩回日月光一言歸社稷尤命備圭章同上

**古今事實**

槐鼎之任

漢光武尤信讖言以王梁孫成名應圖錄越登槐鼎之任

冠冕百辟

齊職品令冠冕百辟從容論道自非勲崇德重無以居之

委任三府

後漢郎顛拜章曰選舉牧守委任三府注三府三公也

三公總務

代宗大曆四年詔西漢以二府分理東京以三公總務

一統萬類

王嘉傳君以道德位在三公以總方略一統萬類分明善惡為

職典天地

晉衛瓘奏曰三公職典天地寶掌人物國之大事取義於此

調和陰陽

漢丙吉為相出逢牛喘吉問牛行幾里或以譏吉吉曰方春少陽用事未可太熱此時氣失節恐有所傷害也三公調和陰陽

職所當憂是以問之又傅子曰三公佐天子理陰陽無所不統又說死三公正天下調陰陽節風雨

位典常經

漢王尊劾丞相衛御史大夫禪位三公典五常九經以總方畧一統類屬教化美風俗為職

詔糾非法

後漢章帝二年詔春秋之義以貴理賤今自三公並宜明糾非法宣振威風

秩號萬石

梁制十八班班高者為貴上公班第十八秩萬石六典注又漢制三公號萬石百官表

象鼎三足

後漢彭宣傳三公鼎足承君一足不任覆亂美實又環濟要略云三公者象鼎三足共承其上也又楊秉傳三公鼎司無所不統又顯宗紀永平六年王雒山出寶鼎詔曰鼎象三公豈公卿奉職得其理耶又韓非子背私曰公象鼎足也數二者法三也

朕之腹心

師丹傳策免曰夫三公者朕之腹心也輔善相過正率百僚和合天下者也

人之喉咽

春秋合議圖曰天理在斗中司三公如人喉在咽以理舌語宋均注曰斗為天之舌口王出政教三公導宣君命論於人則宜

如人喉在咽以理舌口如言有條理分紀

開德宣符

天文上三台六星兩兩而居起文昌列抵太微一曰天柱三公之位也在人曰三公在天曰三公主開德宣符也晉天文志

昭德塞違

三台六星西近文昌一星曰上公為司命次一星曰中公為司中東一星曰下台為司祿所以昭德塞違也同上

主宣德化

天文志杓南三星及魁第一星西三星皆曰三公主宣德化調七政和陰陽之官也

猶天三光

漢成帝時何武建言國之輔佐必得賢聖然猶天之三光備三公官各有分職宜建三公官分職授政以考功效又蕭望之之言三公任非其人則三光為之不明今歲首日月失光外在臣等前本傳

天之三階

漢東方朔對武帝曰願陳泰階六符應劭注曰泰階六符經曰泰階者天之三階也上階為天子中階為諸侯公卿大夫下階為士庶人中階上星為諸侯三公下星為卿大夫之階三階平則陰陽和風雨時天下大安東方朔傳

上應台階

後漢郎顛傳三公上應台階下同元首注三公上象天之台階

下與人君同體者也。又周禮大宗伯疏上曰：司命為太尉，中曰司中，為司徒，下曰司祿，為司空。

下象山獄

陳忠薦曰：三公上則台階，下象山獄，股肱元首，鼎足居職，協和陰陽，調訓五品。

天子所師

漢哀平間始尊師傅之位，明雖天子必有所師。又唐百官志：三師，天子所師，法無所總職。

中書讀策

唐張延賞奏故事冊拜三公，中書令讀策，侍中奉禮如闕，即以宰相攝之。

一代之偉

魏文帝即位時，司空華歆、司徒王朗並先世名臣，文帝罷朝謂左右曰：此三公者乃一代之偉人，後人殆難繼也。

三公共選

晉劉寔作崇讓論，以一官缺擇衆官所讓最多者用之，此為三公缺，三公豫選之，且主選之吏不必任公而選，三公不如令三公自共選一公。

木事咨訪

魏初三公無事，希預朝政，高柔上疏曰：古者刑政有疑，輒議於槐棘之下，自今之後，朝有疑議及刑獄大事，宜數以咨訪三公。三公朝朔望之日，可特延入講論得失，文帝嘉納焉。

分紀 又隋

百官志三公參議國之大事置府僚

謹言奏事

蔡邕上疏曰五年制書令三公謹言奏事是時奉公者欣然得志注漢官儀曰三公聽察長吏臧否人所疾苦條奏之是為舉謹言也

改容禮貌

昔者成王幼在襁抱之中召公為太保周公為太傅太公為太師保保其身體傳傳之德義師道之教訓此三公之職也云云三公之貴皆天子之所以改容而禮貌之也前漢賈誼傳待以殊敬

安帝朝陳忠上疏曰三公稱曰冢宰王者待以殊敬在實為下

御坐為起入則參對而議政出則監察而董是非後陳忠傳

一命衣服

王制曰三公一命衮若有加則賜也不過九命三公八命復加一命則服袞龍與王者之後同

一品金章

齊職儀云三師品第一金章而紫綬進賢三梁冠絳朝服

加賜几杖

沈慶之廢帝時加慶之几杖給三望事慶之每朝賀常乘犢鼻無幘車履行田園無入從行遇之者不知三公也慶之曰我每游履田園有人時與馬成二無人時則與馬成一公乘此車安所之乎及賜几杖並固讓



臨軒遣使

成帝臨軒遣使拜太傅太尉司空儀注太樂宿懸於殿庭門下奏非祭也宴饗則無設樂之制太常蔡謨議曰凡敬其事則備其禮禮備則有樂今大拜輔相臨軒遣使宜有金石之樂從焉

載輿上殿

魏志大傅鍾繇有膝疾拜起不便朝見使載輿車虎賁昇就坐是後三公有疾遂以為故事

乘馬出遊

晉王戎位雖總弔司而委事僚案間乘小馬從便門而出遊見者不知其為三公也

黃閣鳴尾

陳舊制三公黃閣聽事置鳴尾後主時蕭摩訶以功授侍中驃騎大將軍時詔摩訶開閣門施行馬聽事寢堂並置鳴尾

黃閣內屏

隋三公府三門當中開黃閣設內屏

夢松生腹

丁固夢松生其腹上謂人曰松字十八公也後十八年吾其為公卒如夢焉

聞車馬聲

晉魏舒未達時嘗詣野王主人妻夜產俄而聞車馬之聲相問寢者誰曰魏公舒自知當為公矣其後果為司徒

雀報白環

弘農楊寶者嘗見一黃雀墜樹下為螻蟻所困寶救之食以黃  
花百餘日毛羽成放之後寶讀書有黃衣童子向寶再拜曰我  
王母使臣為鴟梟所搏賴君拯濟今當使南海不得復住以白  
環四枚與寶曰令君子孫潔白登三公辭去遂絕寶生震震生  
秉秉生賜賜生彪四世為三公續齊諧記

雀啣三鱧

楊震明經博覽不應州郡禮辟後有冠雀啣三鱧魚墜堂下都  
講取魚進曰蛇鱧啣大夫服之象也數三法三否也先生自此  
升矣後位三公後漢本傳

工相佩刀

晉呂虔有佩刀命工相之當為三公虔以贈別駕王祥曰以子

有台輔之望故相贈後祥果為太保臨薨以刀授弟覽曰汝後  
必興足稱此刀覽後歷世多賢才興於江左

手文可占

陶侃左手有文直達中指至橫文上節便絕占者以為此文通  
位無極侃針挑令徹血流彈壁上仍作公字以紙摹之公字愈  
明異苑

父子居位

晉司馬望安平王孚之長子有才偉早著名咸熙中位司徒入  
晉封義陽王遷太傅太司馬時孚為太宰父子居上公位百代  
以來未之有也

累世三公

漢楊彪博覽衆書有恭孝稱位至司馬太尉自以累世三公耻為魏臣乃不復行又袁宏袁紹四世三公

黑頭三公

晉諸葛恢傳為臨沂令名亞王道度亮謂曰明府當作黑頭三公又後魏書宗室元或少有才學當時甚美侍中崔光見而謂人曰黑頭侍中當此人也

折臂三公

有善相墓者言羊祜祖墓所有帝王氣祜遂鑿之相者見曰猶出折臂三公而祜竟墮馬折臂位至三公晉羊祜傳

平世三公

晉武帝云羊徽蔡邕可為平世三公南史

格外三公

齊明帝即位陳顯達以大尉判鄱陽郡公為三公事雖職典連率人以為格外三公陳顯達傳

三公封侯

崔邑為司空封安陽亭侯三公封侯自此始也

三登三公

後漢胡廣在公位三十餘年禮任甚優凡一履司空再作司徒三登太尉又為太傅其所辟命皆天下之士與故吏陳蕃李咸並為二司蕃等每朝輒稱疾避時人榮之

督察三公

光武時江馮上言宜令司隸校尉督察三公陳元上疏不宜令

有司察公輔之名

兼領六卿

周成王立三公而云官不必備惟其人以書傳考之皆兼領六卿未嘗特置也 容齋隨筆

我不獨拜

世說王丞相既拜司徒歎曰王喬若過江我獨不拜公

吾不敢先

後漢黃憲字叔度同郡陳蕃為三公臨朝歎曰叔度若在吾不敢先佩印綬

三公備員

後漢光武雖置三公事歸臺閣三公之職備員而已

天下無人

晉陸玩謂賓客曰以我為三公是天下為無人

布被釣名

汲黯曰弘位三公俸祿甚多然為布被此詐也上問弘弘謝曰有之夫以三公為布被誠飾詐以釣名 公孫弘傳

食不兼味

長孫道生拜司空加侍中性忠厚廉謹身為三公而衣不華飾食不兼味一熊皮障泥十年不易時人比之晏嬰 分紀 荀爽為三公食不過一肉脫粟飯

並除雙負

真宗天禧元年司徒平章事王旦彭玉元儼同白降制加太保

三公並除雙魚

坐見庶僚

元豐三年除太尉判河南文彥博至河南未交印先就第廟坐以見監司既交府事見監司府官如常式或以問彥博彥博曰吾未視府事三公見庶僚也既交印河南尹見監司矣六年請老拜太師致仕事畧

九居八座

張齊賢四踐兩府九居八座以三公就第康寧福壽世罕其比事畧

手植三槐

王文正公且沉默好學父祐墨之常曰此兒異日必為三公輔

臣因手植三槐於庭以為識

古今文集

雜著

三槐堂銘

蘇軾

天可必乎賢者不必貴仁者不必壽天不可必乎仁者必有後二者將安取衷哉吾聞之申包胥曰人眾者勝天天定亦能勝久世之論天者皆不待其定而求之故以天為茫茫善者以念惡者以肆盜跖之壽孔顏之厄此皆天之未定者也松柏生於山林其始也困於蓬蒿厄於牛羊而其終也貫四時閱千歲而不改者其天定也善惡之報至於子孫而其定也久矣吾以所見所聞所傳聞考之而其可必也審夫國之將興必有世德之

臣厚施而不食其報然後其子孫能與守文太平之主共天下之福故兵部侍郎曹國王公顯於漢周之際歷事宋太祖太宗文武忠孝天下望以為相而公卒以直道不容於時蓋嘗手植三槐於庭曰吾子孫必有為三公者已而其子魏國文正公相真宗皇帝於景德祥符之間朝廷清明天下無事之時享其福祿榮名者十有八年今夫寓物於人明自而取之有得有否而晉公脩德於身責報於天取必於數十年之後如持左契交手相付吾是以知天之果可必也吾不及見魏公而見其子懿敏公以直諫事仁宗皇帝出入侍從將帥三十餘年位不滿其德天將復興王氏也歟何其子孫之多賢也世有以晉公比李栖筠者其雄才直氣真不相上下而栖筠之子吉甫其孫德裕功

名富貴略與王氏等而忠信仁厚不及魏公父子由此觀之王氏之福蓋未艾也懿敏公之子輩與吾遊好德而文以世其家吾是以錄之銘曰

嗚呼休哉魏公之業與槐俱萌封植之勤必世乃成既相真宗四方砥平歸視其家槐陰滿庭吾儕小人朝不及夕相時射利皇郵厥德庶幾僥倖不種而獲不有君子其何能國王城之東晉公所廬鬱鬱三槐惟德之符嗚呼休哉

律詩

君臣慶會閣二首

汪藻

相第新成寶閣開簫韶聲自九天來恩榮屢遣王人出慈慧仍宣禁從陪御筆丹青爭炳煥宸章雲漢共昭回君臣慶會誠難

得舜禹方資稷契才

又

萬豐彤雲拂曉開使華親自日邊來恩頒御墨函初啓燕及群  
臣聘有陪仙掌共承霄露滴客槎擬泛斗星回人間未識乾坤  
象斧藻先憑造化才

又

一德君臣運有開千齡盛事冠將來神仙迥與人寰隔賓主親  
緣國論陪賀厦有情均鼓舞攀雲無路獨遲回尚憐夙被奎文  
潤曾是崇靈樂育才

新編古今事文類聚新集卷之一終

新編古今事文類聚新集卷之二

南江富

大用

時可編

金陵唐

富春

子和刊

三師部

太師

歷代沿革太師古官也殷紂時箕子周武王時太公成王時周  
公並為太師周公薨畢公代之周武王時周公且為太宰掌  
邦治居六卿之首太師之職秦漢不常置平帝始復置漢東  
京獻帝初董卓為太師卓誅又廢魏世不置晉初依周禮備  
置三公太師居首以景帝名師置太宰以代之太宰即古之  
太師也後齊循後魏置太師太傅太保為三師唐置太師一

人以儀刑四海宋朝九重太師趙韓王以勲文潞公以年方得之比曠年不拜自司空五遷方至太師詳見三公類

群書要語尹氏大師維周之氏詩節南山維師尚父時惟鷹揚

大雅赫赫師尹民具爾瞻同上大師維垣垣墻也太師為垣墻

屏蔽之義詩板篇王若曰父師今予祗命公以周公之事書畢

命召公為保周公為師相成王為左右書太師官之極五代史

天子禮樂是經學業不法凡是之屬太師訓之同上太公股肱

周室胙太師以表東海左襄十四冠三公之首為四逸之儀六

帖文王得尚父於盤溪以為師史記師也者教之以事而諭諸

德者也記文王世子伊尹奉鬯王歸于亳王拜手曰既往背師

保之訓弗克于厥初尚賴匡救之德書太甲登拜師垣曾文肅

除呈叔額制以一品之貴紹聖除制躋上公之品秩初寮除鄭

紳制公師類要帝師楊大年制公師極品曾曲阜

制帝師維垣公是制維師極品曲阜行太師制卿勲在廟社名

聞華夷東坡文太師口宣

詩句我公厭富貴東坡次韻韓太師苦勲業尋文武成功後

居為百辟師韓愈賀裴公元輝極上台山谷

古今事實

賜杖免朝

前漢平帝即位太后稱制王莽白太后帝幼少宜置師傅乃以孔光為太傅明年徙光為太師莽為太傅光常稱疾不敢與莽並及莽為宰衡位諸侯王上光愈恐固稱疾辭位太后詔無朝



十日一賜食賜太師靈壽杖黃門令為太師省中位坐置几太師入省中用杖

贊拜不名

隋高祖受禪李穆來朝高祖降坐禮之拜太師贊拜不名字孫雖襁褓悉拜儀同一門執象笏者百餘人貴盛當時無比

縞巾居位

蜀李壽以安車束帛聘龔壯為太師壯固辭特聽縞巾素帶居師友之位晉書

鴻鵠遠志

漢獻帝時董卓自號太師御史中丞以下皆拜皇甫嵩與卓爭權後嵩為中丞見卓拜卓曰可以服未嵩曰安知明公乃至於

是卓曰鴻鵠固有遠志但燕雀不知爾嵩曰昔與明公俱為鴻鵠但明公今日變為鳳凰卓笑曰卿早服何得不拜

舊德自處

馮道為太師以舊德自處然當世之士無賢愚皆仰道為元老而喜為稱譽五代史

正色立朝

顏真卿德宗立拜太師立朝正色剛而有禮贊云晚節偃蹇為姦臣所擠毅然之氣折而不沮可謂忠矣唐本傳

全德始終

裴度拜太師平章事四朝以全德始終及歿天下莫不思其風烈本傳

就賜聖幣

宋朝淳化二年遣右正言張康齋太師趙普生辰聖幣鞍馬就西京賜之故事非同平章無生辰國信之例上以普勳舊故特異其禮會要

詔書加賜

趙普上童告老拜太師封魏國公給宰相俸仍遣其弟齊詔賜之又遣使以詔書賜普曰朕以居守之重慮煩耆耄維師之命用表尊賢仍賜銅羊上尊酒太師其愛精神以副眷注之意東都事畧

以尊老成

文彥博召赴闕司馬公言若令以正太師平章軍國重事亦足

以尊老成矣遂詔一月兩赴經筵六日一入朝至都堂商量事事畧

徧歷公孤

文彥博疑簡莊重有大臣體位將相者五十餘年徧歷公孤兩以太師致仕雖位貌隆重而平居接物謙抑尊德樂善如恐不及邵雍程顥程頤以道學名世而彥博與之交遊元豐中與富弼等十人為洛陽耆英會同上

未嘗並除

故事太師未嘗並除紹聖初始有文潞公彥博吳榮王灝宣和中蔡魯公京童貫貫鄭平樂王紳靖康初燕王俛越王俛紹興中秦申王楷張魯王俊紹興末史會稽王浩嗣秀王伯圭朝野

雜記明野雜記

特拜加恩

建隆至紹熙宰臣生拜太師者五趙普文彥博蔡京秦檜史浩  
惟蔡秦一人以相臣特拜其他皆還政加恩云朝野雜記

獨班減拜

元祐元年四月詔守太師致仕文彥博赴闕獨班起居減拜肩  
輿至下馬慶子弟一人扶掖出入儀制依見任宰臣會要

宗室特拜

本朝親王生拜太師者五人楚王元佐燕王元儼吳王灝燕王  
俟越王德皆以父克行而得之紹熙中嗣秀王伯圭以宗室特  
拜太師蓋王以光宗為親叔父用優禮也同上

元臣優拜

西京留守太保趙普為太師西京養疾以普開國元臣故優拜  
非常例也分紀

古今文集

雜著

除文彥博太師制

鄧潤甫

師傅道之教訓先王所以迪厥官老成重於典刑天下所以資  
其智迺眷舊德時謂元勳謀合祖宗之心名載鼎彝之器申頒  
替策播告外朝守太師開府儀同三司文彥博廓大而清明方  
嚴而信厚出則秉乎旄鉞入則總我鈞衡文武兼備其才夷險  
能致其力畢公之弼四世三紀于茲傳說之總百官萬邦其又

爵隆無富溢之累名遂有身退之榮神明相其壽康人心想其風來是用還之論道倚以經邦以帝者之師臣謀議廟堂之上以天下之大老制馭夷狄之情庶幾有為底于極治晉陪多井申衍真封於戲呂望惟賢起佐文主之治周公已老留為孺子之師矧我耆英無愧前哲往宣一德用格多盤

除文彥博太師河東節度使致仕制 蘇轍

周公未嘗之魯老亦居豐留侯晚雖疆殮終不任事蓋委寄之重初無間然而止足之風所不敢廢惟我耆舊歷事祖宗續服之初復命以位雖師保之地優秩不煩而丘樊之心朝夕以請布告在位俾聞高風太師平章軍國重事上柱國潞國公文彥博克孝而忠允文且武其在師旅有方召之勳其在朝廷有崇

環之業士民視其去就夷狄震其威名時更四朝躬蹈一節先皇帝敗勞以事既許其歸越予訪落之年凜有波淵之志起之既老待以仰成出入五年始終全德進而論道日聞典訓之言倚以折衝率靖邊防之警委成功而不處指莫景以求安勤請屢聞誠心莫奪顧瞻閭井近在洛師郭氏有未巷之嚴裴公有綠野之勝豈以簪紱之累致形氣之勞貴極上公既無復加之爵秩分領全晉仍昇父還之節旌增廣舊封益衍真食殫盡人臣之寵歸從父老之遊於戲音聲不遐尚有就問之禮几杖以俟復期親祀之陪勿以進退之殊而廢謀猷之告式燕且譽俾壽而康

賜太師文彥博乞致仕不允批荅

蘇軾

昔師尚父九十秉旄杖鉞猶未告老此諸葛元遜所以屈張昭也而衛武公百年猶箴儆於國曰無以我老耄而捨我此左史倚相所以誨申公也今卿壽考康寧而退託衰病自引求去獨不念天下之士有如彼二子者議其後乎姑安厥官以答公論

賜太師文彥博乞致仕不允批荅 蘇軾

卿出入四世師表萬民無羨於功名而有厭於富貴其所以忘身徇國捨逸就勞者豈有求而然哉凡以先帝之恩生民之欲也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自至魯穆公無以子思之側而長者去之卿自為謀則善矣獨不為朝廷惜乎藥餌有間時遊廟堂家居之樂何以異此

回文大師啓

歐陽脩

右脩啓切承顯奉制恩荐膺寵拜伏惟驩慶恭惟太師太中器深宏達業茂經綸弛張文武之才出入將相之任而日者來覲見流之遠喜聞履舄之聲從容話言固多仁者之利體貌者哲是惟先帝之臣宜加異數之優以為一面之重維方勞於憂顧籍有素之威名然而患輕四支不足爬搔於蟣虱坐制萬里理當根本於朝廷即期廊廟之來歸始慰士夫之素望過蒙謙挹曲示誨言趨膺祀以無由積感悚而徒切

律詩

上蔡大師生辰

汪藻

萬古儲英氣生賢鎮廟祧方春回暖律隨帝下神霄早歲陪興

運清忠服邇僚。三篇俱說命。兩紀獨承堯。為國隆堂陛。中天幹  
 斗杓。光華歸使謀。寧謚載民誥。九牧金成鼎。三山石峙橋。元圭  
 來舊錫。神寶獻新雕。堂起房心次。音諧角徵韶。車書人一統。符  
 瑞歲千條。壁海材愈盛。沙場虜不驕。獻琛皆累譯。入穀有垂髫。  
 郭解雙封國。班超五日朝。嘉謀從昔合。願業更誰昭。春禮群臣  
 異恩光。此日饒。授圖開地壯。傍闕築堤遥。供帳移金屋。歌鍾實  
 綺寮。名園藏茂密。華閣聳岩峩。詔蹕迂臨幸。宸毫紀宴招。弟兄  
 聯袞繡。孫子列蟬貂。印琢金為彩。魚懸玉在腰。中姻連築沁。外  
 族綴塗椒。帝子傳盃杓。宮嬪作鼓簫。果新無獨享。羹美或親調。

上蔡大師生辰

汪藻

宇宙將昭泰。風雲必會周。帝師黃閣老。人羨黑頭公。慶節同堯

曆新陽。應嶰筒。儀韶來彩鳳。占夢得真能。壽考天資魯。神靈嶽  
 降嵩。典儀尊赤鳥。歌詠美彤弓。夷險無殊節。誠明信保躬。濟川  
 先眾楫。遵渚集飛鴻。炳炳丹青筆。堂堂社稷忠。斗杓還列宿。簾  
 陛倚層穹。文武俱為憲。詩書執此隆。規模三代遠。謀畧萬夫雄。  
 字畫諸王品。文章兩漢風。早登青瑣闥。頻入紫微宮。器敏無餘  
 刀。才豪妙吐虹。聲光連日月。氣槩俯華戎。天上經綸合。人間制  
 作工。向來疑庶績。誰復簡清衷。經誦三雍富。舟車四海通。地歸  
 銅柱北。春滿玉關東。養士菁莪盛。論才駿馬空。聖時方密勿。賢  
 業助昭融。螭紐乾符正。龍文帝鼎崇。伊湯咸有德。房杜不言功。  
 禮秩群臣異。恩波此日豐。宸章頒琬琰。相第列幃幃。東壁文昭  
 爛。西昆氣鬱葱。節旄藏棨戟。茅土啓龜蒙。袞繡卿雲裏。貂蟬瑞

藹中御奩金寶帶神鹿王花驄蓬島波全濶天鈞樂未終禁香  
紛縹緲朝佩雜玲瓏芝草盈田紫蟠桃照海紅後彫疑秀髮難  
老湛方瞳水質期姑射丹砂喚葛洪潛機神宇定晬表德符充  
瑞鶴千年羽靈著五色叢舊傳調鼎客今識鈞璜翁世世聯台  
衮年年拱帝聰欲知耆笑永元氣等無窮

太傅

**歷代沿革** 太傅古官也。太傅品秩冠服同太宰。**成王**即位周公  
為之後康叔畢公亦為之。**秦**無其職。漢惠帝崩高后元年以  
丞相王陵為少傅太傅金印紫綬位在三公上。**後漢**光武惟  
置太傅有府寮拜故密令卓茂為之明帝以鄧禹為之章帝  
已下初即位皆置太傅錄尚書事。**魏**初唯置太傅以鍾繇為

之。晉宣帝為魏太傅。齊唯置太傅。梁武帝受命之初官班多

同宋齊之舊有大傅陳以為贈。後齊置太師太傅太保是為

三師。唐置太傅一人。元見三公類

群書要語凡三王教世子立太傅少傅以養之欲其知父子君

臣之道也。天子不惠於庶人不信於諸侯不戒於戎事

凡事之屬太傅之任。大戴記 傅相天子於德義。書孔安國注太

傅審父子君臣之道以示之。少師奉世子以觀太傅之德而審

喻之大傅在前。記文王世子

詩句吾愛白樂天逸才生自然誰謂辭翰器乃是經濟賢。皮日

休自太傅詩 賢相謝世運遠圖因事止高揖七州外拂衣五湖  
裏注賢相太傅謝安也。文選謝靈運述祖德詩

古今事實

逃奔國盜

晉使隨會為太傅於是以晉國之盜逃奔于秦左傳

芟夷閹宦

陳蕃年十五嘗閑處一室蕪穢不掃曰大丈夫當掃除天下安事一室乎寶后臨朝以蕃為太傅錄尚書事蕃與后父大將軍竇武同心盡力徵用名賢共參政事其志欲芟夷閹宦以清本朝

正身立朝

趙熹內典宿衛外幹掌職正身立朝未嘗懈惰肅宗即位進為大傅錄尚書事

在位修身

和帝即位以鄧彪為太傅錄尚書事賜爵關內侯永光初竇氏專權驕縱朝廷多有諫諍而彪在位修身而已不能有所匡正研覈是非

曹植輔臣論曰精微聽察理折毫分規矩可則呵保不傾羣言系于口而研覈是非與詰總干心而唯所用之者遂拜太傅練達事體

後漢胡廣字伯始為太傅年八十四練達事體明解朝章雖無蹇直之風屢有補闕之益故京師語曰萬事不理問伯始天下中庸有胡公本傳

無咎無譽

後漢胡廣贊曰鄧張作傅無咎無譽胡公庸庸飾情恭貌朝章



雖理據正或撓

三讓彌高

和帝策鄧彪曰元功之族三讓彌高可令為大傅百官志

百僚為式

鄧彪在位清白為百僚式和帝即位拜大傅多有諫諍漢本傳

賜爵封侯

漢元帝即位蕭望之周堪本以師傅見尊重後詔御史國之將

與尊師而重傅前將軍蕭望之傅朕八年道以經術厥功茂焉

其賜爵關內侯給事中蕭望之傳

東向如賓

漢明帝以鄧禹先帝元功拜為太傅進見東向甚見尊寵注臣

當北向尊如賓故令東向鄧禹傳

恩寵莫比

和帝即位幼弱以鄧彪有高名海內歸仁召為太傅百官總已

以聽之恩寵之隆莫與為比通鑑

戴車上殿見三公門

乘輿上殿

晉何曾為太傅乞遜位詔令會朝劔履乘輿上殿如漢相國蕭

何魏太傅鍾繇故事焉本傳

几杖不朝

晉鄭冲抗表致仕詔曰太傅懿德深遠履行高潔可謂朝之雋

老屢以年高告退令聽其所執以壽光公就第位同保傅几杖

事文類聚新集 卷之二  
不朝本紀

賜几杖車馬

光武即位詔曰前密令卓茂名冠天下當受天下重賞今以茂為太傅封褒德侯賜几杖車馬卓茂傳

給帷帳床褥

後漢張禹拜太傅錄尚書事劉蒼以孺帝幼育欲令重臣居禁內乃詔禹舍宮中給帷帳床褥太官朝夕進食五日歸府每朝贊與二千公絕席本傳

賜女樂田畝

北齊高歸彥作亂冀州段紹與東安王樓叡率眾討之遷太傅賜女樂十人并歸彥田園一千畝

金印紫綬見公華

三為太傅

後魏淮陽王欣太統中為太傅文帝謂欣曰王三為太傅再為太師自古人臣未聞有此例欣遜謝而已

三世元老

章帝詔曰行太尉事趙熹三世在位為國元老其以熹為傅時年八十繼母在堂言不稱老東觀漢紀

不驕勢位

後周王盟為太傅姿度弘雅仁而泛愛雖居師傅禮冠群后而謙恭自處未嘗以勢位驕人

不持威儀

事文類聚新集 卷之二 十一 德壽堂梓

達奚武拜太傅賤時好華飾及居重位不持威儀行常單馬門  
不施戟常畫揜一扇或謂武曰公位冠群后功名蓋天下出入儀  
衛不稱其體何輕率若是武曰且天下未平國恩未報安適事  
威儀乎言者慙而退分紀

自號退傅

張士遜上童請老就拜太傅進封鄧國公致仕宰相謝事自士  
遜始也就第十年而薨年八十一士遜歸老號退傅啓國於鄧范  
仲淹適守鄧州士遜還鄉仲淹置酒高會明日士遜復置會揮  
金甚盛時人榮之東都事畧

退閑杜門

紹興十一年韓世忠以太傅奉朝請秦檜主和議世忠乃力求

閑退自此杜門謝愛絕口不言兵時騎驢攜酒從一童奴游  
西湖以自樂平時將佐亦罕得見係年錄

進封國公

紹興十一年少師樞密使濟國公張俊除太傅進封廣國公文  
十一月太保樞密使韓世忠除太傅仍奉朝請

古今文集

雜著

除呂公弼樞密使檢校太傅制 張方平

本朝之制地分二府之嚴執政之臣共幹庶邦之重文武承式  
兵民是圖屬在賢明總司使職誕敷明制敷告大廷具官呂公  
弼器縕純明機靈精遠瓌林任重中廣廈之棟梁雅音自和合

清朝之琴瑟登貳樞機之密洽聞議慮之長屢陳憂國之言多  
發便時之策深明玉體有簡朕心宜陞帝傳之崇以正本共之  
任爰由增賦真食衍封名器益隆典章允穆於戲信而能用嘗  
思明哲之難知無不為期盡臣鄰之益祇若休命以贊大猷

王介甫贈太傅制

宋景文

勅式觀古初灼見天命將有非常之大事必生希世之異人使  
其名高一時學貫千載知足以達其道辨足以行其言瑰璋之  
文足以藻飾萬物卓絕之行足以風動四方用能於期歲之間  
靡然變天下之俗具官某少學孔孟晚師瞿曇網羅六藝之遺  
文斷以己意糝糠百家之陳迹作新斯文屬熙寧之有為冠群  
賢而首用信任之篤古今所無方需功業之成遽起山林之興

浮雲何有脫屣如遺屢爭席於樵漁不亂群於麋鹿進退之美  
雍谷可觀朕方臨御之初衰疾罔極乃眷三朝之老邈在大江  
之南究觀規模想見風采豈謂告終之問在子諒闇之中胡不  
百年為之一涕於戲外生用舍之際孰能違天賜賻哀榮之文  
豈不在我寵以師臣之位蔚為儒者之光庶幾有知服我大命  
可贈太傅

律詩

紀送太傅相公歸闕

范仲淹

縉紳誰敢望差肩獨向昌朝協半千首會雲龍游少海親扶日  
月上中天碧油兩就元戎鎮黃閣三提冢宰權坐致唐虞成大  
化退居師傅養高年閑披丹訣開爐竈醉度清歌被管絃同榜

韓文類聚卷之三十一 德壽堂

幾人登將相滿朝今日望神仙松楸蕪草思純孝里巷揮金過昔賢歸赴誕辰知先說輕鞍拜舞壽觴前

張太傅生日詩

晏元獻

三陟槐庭二將壇冊書文武載勲賢辭榮尚峻經邦秩養素方臨釣渭年清會別開金谷墅新吟多雜葉珠篇驚羨今日增華耀海內簪紳共祝延

太保

歷代沿革太保古官商太甲時伊尹為之周成王時召公為之漢平帝元始元年初置金印紫綬次太傅始用王莽為之後漢至魏不置末年以鄭冲為之晉武初以王祥為太保進爵為公梁武受命之初官班多同宋齊之舊有太保陳以贈

後齊置太師太傅太保為三師唐太保一人天寶以前唯以其官贈竇季謀而已大元見三公類

辭書要語入則有保保也者慎其身以輔翼之而歸諸道者也

記文王世子慎其身者謹安護之禮記注保安也以道安人主者也書曰召公為保相成王為左右禮地官既往背師保之訓

弗克于厥初尚賴匡救之德太保保安天子於德義尚書注

在太甲時則有若保衛王伊尹為保衛言天下之所取乎書君

與昔先正保衛說命公曰君告汝朕允保與其汝克敬君與太保朝至于洛卜宅厥既得卜則經營書召誥太保所以訓護人

主尊以德義者也通典詩句詔出未央宮登壇近總戎上公周太保副相漢司空弓抱

韓文類聚卷之三十一 德壽堂

關西月旗翻渭北風弟兄皆許國天地荷成功

岑參軍送太保

古今事實

作旅葵訓

周武王時西旅底貢厥葵太保作旅葵用訓于王

相宅洛邑

成王在豐欲宅洛邑使召公先相宅作召誥曰惟太保先周公

相宅

尚德依仁

晉帝詔曰太保何曾尚德依仁明允篤誠翼贊先皇光濟帝業

分紀

崇道弘化

王隱書曰王祥字休徵拜太保制曰耆艾元老高行清粹朕所倚毗以崇道弘化

明允篤誠

太保衛瓘明允篤誠有匪躬之志 晉起居注

含素遲暮

晉書贊曰鄭冲含素王祥遲暮冲與祥俱曾為太保冲後遷為

太傅

對掌朝政

晉汝南王亮為錄尚書事與太保衛瓘對掌朝政 分紀

善於撫士

蜀李雄錄曰雄異母兄始字伯敬為太保善於撫士衆多歸之

時人為之語曰欲養老屬太保

給兵千人

晉衛瓘字伯玉生早老遜位進位太保以公就第給親兵百人置

長史司馬從事郎掾屬惠帝即位復給瓘千兵

加置七官

晉武初踐祚以王祥為太保進爵為公加置七官之職

趙光逢以司徒致仕天成中即其家拜太保封齊國公五代史

門無雜賓

晉王祥薨奔赴者非朝廷之賢則親親故吏而已門無雜賓之賓族孫王戎歎曰太保可謂清遠矣

同日降制

宋天禧元年司徒平章事王旦荆王元儼同日降制加太保三公併除雙員自此始也

再任加封

熙寧元年潞國公文彥博守太保兼侍中再任彥博辭太保止受所加封再任從之會要

使相改除

紹興十年少保萬壽觀使兼三鎮節度使劉光世除太保少師充京東宣撫處置使韓世忠除太保

古今文集

雜著

事類彙編

答史大保別紙

朱元晦

熹昨者狂妄輒以謔言仰瀆崇聽自循分守當得謹斥之罪不  
 以免於罪戾為喜而又得側聞前此告猷之益天下已有陰受  
 其賜者尤切增氣尚恨未得躬扣昌言之目以發蒙昧耳今者  
 邊事益急變異荐臻人無智愚共以為懼然喜淺陋切以為境  
 外之傳未定憂而謹告之深為可畏也今朝廷於其不足慮者  
 既已過為之防而於其深可畏者反未有處熹甚惑焉夫以災  
 異而求直言歷世相傳具有故實明公身為天下太老誠有憂  
 國之心不當俯及細務願以此意為上一言使幽險之情得以  
 上通則天下之言皆明公之言而明自達聰感名和氣皆明公  
 之功矣感激容貸之恩懷不能已敢復言之俯伏俟罪

二卷終

新編古今事文類聚新集卷之三

南江

富大用

時可

編

金陵

唐富春

子和

刊

三公部

太尉

歷代沿革 堯時舜為太尉 秦時金印紫綬掌武事 漢惠帝六年  
 置太尉官 孝文三年置 七年省 武帝建元二年置 五年省 元  
 狩六年法周制更名大司馬 世祖建武二十七年罷大司馬  
 復置太尉 靈帝末以劉虞為大司馬 而太尉如故 齊太尉品  
 第一 梁武初同宋齊之舊有太尉 後齊置大尉 司徒司空為  
 三公 後魏有大將軍不置太尉 正光以後並置 唐太尉一人



宋仍唐舊政和二年御筆改太尉為武選一品之任在節度使上元以太尉司徒司空為三公

群書要語孟夏之月命太尉贊傑俊遂賢良舉長大行爵出祿必當其位月令掌四方兵事功課歲盡即奏其殿最而待賞罰

凡郊祀之事掌亞獻凡國有太造太疑則與司徒司空通而論之國有過事則與三公通諫諍之本注三公星在北斗杓南主

宣德化和陰陽若今之太尉司空之象也天文錄

詩句對墓陪謝傅把劍覓徐君杜別房太尉墓家呼小太尉國

號太凉公杜牧時李晟官至太尉子想亦贈太尉

古今事實

憂心如醉

劉寬為太尉常於坐被酒睡伏靈帝問曰太尉醉耶對曰臣不敢醉但任重責大憂心如醉

冲心愈約

郝鑿為太尉雖在公位冲心愈約勞謙日具誦玩墳索自少至長身無擇行

有不貳心

冲帝詔書曰太尉趙峻二世掌典樞衡有匪石不貳之心

有不惑

揚秉為太尉嘗曰我有三不惑酒色財天下稱為名公

忠正不撓

冲帝詔書曰三公國之棟幹朝廷取正以成斷金大司農李固

忠正不撓

公族之苗忠正不撓有史魚之風其以固為太尉

恭慎自守

王龔為太尉在位恭慎自守非公事不通州郡書記其所辟命皆海內長者

左袒安劉

漢高祖疾甚呂后問大臣上曰周勃重厚少文然安劉氏必勃也可令為太尉帝崩呂氏謀為亂太尉勃持節入北軍呼曰為劉氏者袒左為呂氏者袒右軍皆袒左為劉氏

入租助國

張禹為太尉時連歲災荒府藏空虛禹上疏求入三歲租稅以助郡國遺餼

觸目琳琅

有人詣王太尉遇安豐大將軍丞相在往別屋見秀胤平子還語人曰今日之行觸目琳琅與珠玉

每顧髮豎

唐宣宗即位李德裕奉冊太極殿帝退謂左右曰彞行事近我者非太尉耶每顧我毛髮為森豎翼日罷為檢校司徒同中書門下平章事

奏劾近官

楊秉除太尉時中常侍侯覽參為益州刺史累有贓罪暴虐一州秉劾奏參檻車徵詣廷尉參惶遽自殺秉因奏覽及中常侍具瑗書奏尚書召對秉椽屬曰公府外職而奏劾近官經典漢

制有故事乎。秉使對曰。春秋趙鞅以晉陽之甲逐君側之惡。傳曰。除君之惡。惟力是視。漢世故事。三公之職。無所不統。尚書不能詰。

單坐使人

靈帝以羊續為太尉。時拜三公者。皆輸東園禮錢千萬。令中使督之名曰左騶。其所之往。輒迎致禮敬。厚贈賂。續乃坐使人於單席。舉縵袍以示之。曰。臣之所資。惟斯而已。左騶白之。帝不悅。以此故。不登公位。注騶。騎士也。

不受遺金

太尉范隆曾有所薦。得美官者。於閭中以金遺隆。隆數而責之。言人不知也。謹不敢漏泄。父母兄弟隆曰。神已知之。其可欺耶。

遂絕之。崔鴻前趙錄

還所賜物

李咸孤特自立。自大鴻臚拜太尉。自在相位。約身率下。常食脫粟飯。醬菜而已。刺史二千石牋記。非公事。不發省。以先乞骸骨。見許。悉還所賜物。乘敝牛車而去。

白鹿隨車

鄭弘為臨淮太守。行春。有兩白鹿隨車。挾轂而行。弘恠問主簿。買國鹿為吉。凶國拜賀。曰。聞三公車。圖畫作鹿。明府當為宰相。後果為太尉。

飛鵲墮印

後漢常山張顛為梁相。天新雨。後有鳥如鵲。飛翔。稍下墮地。人

類聚新集 卷之三 德壽堂梓

取化為一圓石顯推破之得金印曰忠孝侯印顯表上聞藏之  
秘府靈帝時至太尉博物志

使者八至

晉桓溫授待中大尉固讓不受旬月之間使者八至輅車相望  
於道

公口三登

胡廣在公台二十餘年歷事六帝禮任甚優凡一履司空再作  
司徒三登太尉又為太傅其所辟命皆天下名士

以副眾望

孫皓詔曰范慎勲德俱茂朕所倚馮宜登上公以副眾望可為  
太尉

為立五廟

唐李晟為太尉詔為晟立五廟官給牲牢祭器旅帳禮官相儀  
以稱焉後李晟子愬亦為太尉

楊氏四世

楊震秉賜彪四世為太尉德業相繼為東京名族

唐興七人

唐李德裕拜太尉固讓言唐興太尉惟七人臣願守舊秩足矣  
帝曰吾恨無官酬公無固辭

金童紫綬

齊太尉品第一金童紫綬進賢二梁冠絳朝服佩玄玉  
玄衣纁裳

唐李德裕拜太尉固讓言唐興太尉惟七人臣願守舊秩足矣

帝曰吾恨無官酬公無固辭

晉制郊廟太尉是服七旒衣纁裳服七章

置屏隔坐

鄭弘少為鄉耆夫太守第五倫行春見而奇之召署督郵後弘為太尉時舉將第五倫為司空班次在下正朔朝見弘曲躬而自卑帝問之知其故遂聽置雲母屏風分隔其間由此為故事

升殿賜坐

宋天禧元年王旦加大尉入謝便座上以其羸瘠拜起頗難命謂者扶掖升殿賜坐勞問又遣其子大理評事雍贊官告賜之加襲衣金帶鞍勒馬如宰臣例

古今文集

雜著

段太尉逸事狀

柳宗元

太尉始為涇州刺史時汾陽王以副元帥居蒲王子晞為尚書領行營節度使寓軍邠州縱士卒無賴吏不得問日羣行丐取於市不噉輒奮擊折人手足推金帛在道盈道上犯臂徐去至撞殺孕婦人邠寧節度使白孝德不敢言太尉自州以狀白府願計事至則曰天子以生人分公理公見人被暴害因恬然且大亂若何孝德曰願奉教太尉曰某為涇州甚適少事今不忍人無寇暴以亂天子邊事公誠以都虞候命某者能為公已亂彼公之人不得害孝德曰幸甚如太尉請既署一月晞軍士十七人入市取酒又刃刺酒翁壞釀器酒流溝中太尉列卒取

十七人皆斫頭注槊上植市門外晞一營大譟盡甲孝德震恐  
召大尉曰將奈何大尉曰無傷也請辭於軍孝德使數十人從  
大尉大尉盡辭去解佩刀選老健一人持馬至晞門下甲者出  
大尉笑且入曰殺一老卒何甲也吾戴吾頭來矣甲者愕因諭  
曰尚書固負若屬耶副元帥固負若屬耶奈何欲以亂敗郭氏  
為白尚書出聽我言晞出見大尉大尉曰副元帥勳塞天地當  
務始終今尚書恣卒為暴暴且亂亂天子邊欲誰歸罪且及  
副元帥今邠人惡子弟以貨買名軍籍中殺害人如是不止幾  
日不大亂大亂由尚書出人皆曰尚書倚副元帥不戢士然則  
郭氏功名其與存者幾何言未畢晞再拜曰公幸教晞以道恩  
甚大願奉軍以從願此左右皆解甲散還入伍中敢譁者以大

尉曰吾未哺食請假設草具既食曰吾疾作願留宿門下命持  
馬者去且自來還臥軍中晞不解衣戒僕卒擊析衛大尉且俱  
至孝德所謝不能請改過邠州由是無禍

上韓大尉書

蘇轍

大尉執事轍生好為文思之至深以為文者氣之所形然文不  
可以學而能氣可以養而致孟子曰我善養吾浩然之氣今觀  
其文章寬厚宏博充乎天地之間稱其氣之小大太史公行天  
下周覽名山大川與燕趙間豪俊交遊故其文踈蕩頗有奇杰  
此二者者豈嘗執筆學為如此之文哉其氣充乎其中而溢乎  
其貌動乎其言而見乎其文而不自知也轍生十有九年矣其  
居家所與遊者不過其鄰里鄉黨之人所見不過數百里之間

無高山大野可登覽以自廣百氏之書雖無所不讀然皆古人  
之陳迹不足以激發其志氣恐遂汨沒故決然捨去求天下奇  
聞壯觀以知天下之廣大過秦漢之故都恣觀終南嵩華之高  
北顧黃河之奔流慨然想見古之豪傑至京師仰觀天子宮闕  
之壯與倉庫府庫城池苑囿之富且大也而後知天下之巨麗  
見翰林歐陽公聽其議論之宏辨觀其容貌之秀偉與其門人  
賢士大夫遊而後知天下之文章聚乎此也太尉以才學冠天  
下天下之所恃以無憂四夷之所憚以不敢發人則周公召公  
出則方叔召虎而轍也未之見焉且夫人之學也不志其大雖  
多而何為轍之來也於山見終南嵩華之高於水見黃河之大  
且深於人見歐陽公而猶以為未見太尉也故願得觀賢人之

光耀聞一言以自壯然後可以盡天下之大觀而無憾者矣轍  
年以未能通習吏事嚮之來非有取於斗升之祿偶然得之非  
其所樂然幸得賜歸待選使得優游數年之間將歸益治其文  
且學為政太尉苟以為可教而辱教之又幸矣

賀文太尉啓

蘇軾

伏審孳號揚庭臨軒遣使出節少府授鉞齋壇夷夏聳觀兵民  
交慶蓋功業盛大則極名望而後稱惟德慶宏達故處富貴而  
若無爵為三世之宗臣豈獨一時之盛事恭惟留守太尉道本  
天合德為人師信及三川之豚魚威加兩河之草木身任休戚  
言為重輕始若留侯弱冠而遇高祖晚同尚父黃髮而亮武王  
既奉冊書益新民聽方將威懷北虜係頸長纓約束河公軌流

故道然後入調伊傳之鼎歸躡松喬之游輿論所期斯言可必  
軾謫官有限趨侍無緣踴躍之心宜寫難盡

古詩

上劉侍中

楊巨源

命代生甫甫承家翊禹湯廟謨膺間氣師律動清霜鍾鼎勳庸  
大山河誠誓長道叶陶鈞力思迴日月光一言弘社稷九命備  
珪璋朱門重綵戟丹詔半縑緗射鵰天更碧吹角塞仍黃功垂  
貞石遠名映色絲香斷磧瞻魏武臨池識鳳皇珠影含空徹瓊  
枝映座芳軍容雄朔漠公堂冠巖廊

律詩

御製段太尉碑詩

多難全高節時清終相君園坐標古篆雨露降天文

上羅鄴王

羅隱

營室東迴陰赤丘少年承襲擁青油坐調金鼎尊明主橫把瑠  
弓傲列侯

司徒

歷代公董以吳氏以鳥名官而祝鳩氏為司徒堯時舜為司徒  
漢攝帝位命契為司徒契玄孫曰微亦為夏司徒周地官司  
徒掌邦教秦為丞相漢西京初不置丞相元壽二年罷丞  
相置大司徒以孔光為之光武二十七年去大字自漢歷魏  
置為三公及晉迄江左其官相承不替宋有丞相又置司徒  
齊以丞相為贈官而司徒品秩冠服同丞相郊廟服冕同太



尉尉又兩置陳氏以丞相為贈官後魏正光之後復兩置也

**齊廢丞相**乾明中又兩置後周並廢丞相置司徒宋因之

**群書要語**帝曰契百姓不親五品不遜汝作司徒敬敷五教在

寬書舞典司徒掌邦教敷五典擾萬民周官司徒脩六禮以飾

民性明七教以興民德齊八政以防淫一道德以同俗養耆老

以致孝恤孤獨以逮不足尚賢以崇德簡不肖以黜惡記王制

司徒巡行縣鄙命農勉作月令大司徒之職掌建邦之土地之

圖與其人民之數以佐王安擾邦國以天下之圖周知九州之

地域廣輪之數辨其山林川澤丘陵墳衍原隰之名物禮地官

凡建邦國以土圭正其地而制其域同上以五禮防萬民之偽

而教之中以六樂防萬民之情而教之和同上以保息六養萬

民同上矧惟若疇圻父薄違農父若保安父定辟注農父司徒

也書酒誥和五教理人倫使風行俗平萬國咸寧者謂之司徒

古今詩句緇衣之宜兮敬予又改為兮適子之館兮還予授子之粢

今詩鄭風司徒清鑒懸明鏡杜洗兵馬

**古今事實**

丞相之職

晉何曾以太保侍中領司徒曾固讓詔曰司徒舊丞相之職自

舌及今總論人物化治之本以君弘道故選於衆而復盤桓非

所聞也

五教之官

每之類身系集

後三所至本

九

九

九

九

九

九

晉石苞拜大司馬策免以公歸第詔以苞為司徒雖以過防受  
黜尋授五教之官深陳農桑本務明其考課居五年天下稱之

聖人在政

魯侯欲以孔子為司徒將召三桓議之乃謂左丘明左丘明曰  
孔丘其聖人歟夫聖人在政過者離位焉君雖欲謀其將弗合  
乎魯侯曰吾子奚以知之丘明曰周人有愛裘而好珍羞欲為  
千金之裘而與狐謀其皮欲其少牢之珍而與羊謀其羞言未  
卒狐相與逃於重丘之下羊相呼藏於深林之中故周人五年  
不制一裘十年不足一牢何者周人之謀失矣今君欲以孔丘  
為司徒召三桓而議之亦與狐謀裘與羊謀羞哉於是魯侯遂  
不與三桓謀而召孔丘為司徒

父子善職

鄭武公父子並為司徒善於其職國人宜之鄭風緇衣詩

股肱心膂

穆王命君牙為周太司徒王若曰嗚呼君牙惟乃祖乃父服勞  
王家厥有成績紀于太常今命爾予翼作股肱心膂乃舊服  
毋忝祖考

謀謨惟幄

漢光武即位於鄗使使持節拜鄧禹為大司徒策曰前將軍禹  
深執忠孝與朕謀謨惟幄決勝千里今遣奉車都尉授印綬封  
為鄴侯邑萬戶敬之哉禹時年二十四

明察守正

侯霸字君房為大司徒封關內侯在位明察守正奉公不阿

恭約盡忠

馮勤字偉伯遷司徒先是三公多見罪退帝賢勤欲令以善自終乃因宴見從容戒之曰朱浮上不忠於君下陵轢同列竟以中傷至今然生吉凶未可知豈不惜哉人臣放逐受誅雖復追加賞賜賻祭不足以償不賞之身忠臣孝子覽照前世以為鑒誠盡忠於國事君無一則爵賞光于當世功名列於不朽可不勉哉勤愈恭約盡忠號稱職任

憂念王室

袁安為司徒每朝會憂念王室未嘗不流涕

奏課農桑

石苞為司徒奏州郡農桑未有賞罰之制宜遣椽屬循行皆當均其土宜舉其殿最然後黜陟

自執牙籌

晉王戎拜司徒雖位總台司而委事僚采間乘小馬從便門而出遊見者不知其三公也故吏多至大官道路相遇輒避之性好興利廣收八方園田水碓周徧天下積貫夥錢不知紀極每自執牙籌晝夜策計恒若不足而又儉嗇不自奉養天下人謂之膏肓之疾

吏皆皂服

王渾遷司徒仍加兵渾以司徒文官主吏不持兵及吏屬絳衣自以非是舊典皆令皂服論者美其識體

清貧蔬食

華歆為司徒素清貧文帝出詔曰司徒國之雋老所以和洽湯  
理庶事今大官重膳而司徒蔬食甚無謂也特賜御衣

臥麤布被

劉寵為司徒臥麤布被

家無擔石

華歆文帝時為司徒素清貧祿賜以振施親戚故家無擔石之  
儲公卿常並賜沒入家口唯歆出而嫁之帝歎息

子無立錐

范遷為司徒有宅數畝田不過一頃復推與其兄子其妻常曰  
君有四子無立錐之計

逕還童綬

魏舒字陽元為司徒年過致仕有遜讓童而無居宅乃漸以奉  
秩之餘為第之所舒素為人先行而後言故未嘗語親疎言當  
遜位元年正月整法服入殿朝會罷逕還奉送童綬內外莫有  
知舒此情者

不污官府

山濤為司徒固辭已勅斷童表乃臥加童綬濤曰垂沒之人豈  
可污官府乎與疾歸家

板輿上殿

晉司徒傅祗疾遜位不許板輿上殿  
劔履上殿

晉何曾以太傅領司徒屢遜位詔以司徒所掌煩務不可以久  
勞者受其進位大朝會乘輿劔履上殿如漢蕭何魏鍾繇故事

詔頒天下

宋宰相呂夷簡詔特守司徒依前兼門下侍郎同中書門下平  
章事二表懇讓不敢當乃降詔上令錄其詔書頒于天下使四  
海之人知朝廷有退讓之臣

夢禾得秩

蔡茂字子禮為司徒在職清儉匪懈茂初在廣漢夢坐大殿極  
上有三種禾挑取之得其中穗輒復失之以問主簿郭質質離  
席慶曰夫殿者官府之形象也極而有禾人臣之上祿也取中  
穗中白之位於字禾失為秩雖曰失之乃所以得祿秩也衣職

有關公其補之旬月而茂徵焉

見虹策免

郎顛上章曰切見今月十四日乙卯時白虹貫日見日有氣色  
白而純者名曰虹貫日中者侵太陽也見於日有政變常也易  
傳曰公能其事序賢進士後必有喜反之則白虹貫日以甲乙  
見則譴在中台自司徒居位陰陽多謬宜黜司徒以應天意注  
韓詩外傳曰三公者司空司徒司馬也司馬主天司空主地司  
徒主人故陰陽不調星辰失度責之司馬山林崩絕川谷不流  
責之司空五穀不殖草木不茂責之司徒甲乙東方主春生殖  
五谷之時也而白虹以甲乙日見明責在司徒也時劉崎為司  
徒至陽熹三年策免

銅臭三公

崔烈歷位郡守九卿靈帝時開鴻都門榜賣官爵公卿州郡下  
至黃綬各有差烈入錢五百萬得為司徒于是聲譽衰減問其  
子鈞曰吾居三公於議者何如鈞曰大人少有英稱歷位卿守  
論者不謂當為三公而今登其位天下失望烈曰何謂然也鈞  
曰論者嫌其銅臭

落水三公

宋謝超宗為人恃才使氣多凌忽司徒褚彥回因送湖州刺史  
王僧虔閣道壞墜水僕射王儉驚跳下車超宗撫掌笑曰落水  
三公墮車僕射彥回出水沾濕狼籍超宗先在僧虔舫聲曰有  
天道焉有地道焉天所不容地所不受投拜河伯河伯不受彥

古今文集

律詩

田大怒曰寒士不遜超宗曰我不賣哀劉得富貴焉能免寒乎

故司徒李公光弼

杜甫

司徒天寶末北收晉陽甲胡騎攻吾城愁寂意不愜人安若秦  
山薊北斷右脅朔方氣乃蘇黎首見帝業一宮泣西郊九廟起  
頽壓未散河陽卒思明偽臣妾復自碣石來火焚乾坤獵高視  
笑祿山公又大獻捷異王冊崇勳小敵信所怯擁兵鎮河汴千  
里初妥帖青蠅紛營營風雨秋一葉內省未入朝然淚終映睫  
太屋去高棟長城掃遺堞平生白羽扇零落蛟龍匣雅望與英  
姿惻愴槐車接三軍晦光彩烈士痛稠疊直筆在史臣將來洗

專文類集卷之三  
箱篋吾思吳孤家南紀阻歸楫扶顛永蕭條未濟失利涉疲菑  
竟何人灑涕巴東峽

司空

歷代公董司空古官少昊氏以鳥紀官爽鳩氏司空也  
以禹為司空契之子曰冥為夏司空商湯時外官置為司空周  
時司空為冬官掌邦事成王以毛公為司空春秋時宋以武  
公之諱改司空為司城秦改司空為莫敖秦置御史大夫省  
司空漢西京初不置成帝綏和元年更名御史大夫為大司  
空哀帝建平二年復為御史大夫元壽二年復為大司空光  
武二十七年去大字獻帝建安十二年又罷司空置御史大  
夫魏省御史大夫置司空景初二年以司隸校尉崔林為司

空晉以荀顛為之歷宋齊梁陳後魏北齊皆省御史大夫置  
司空後周二職並廢隋氏諱忠以御史中丞為大夫故又置  
司空唐司空一人宋仍之

群書要語舜曰咨四岳有能奮庸熙帝之載兪曰伯禹作司空  
帝曰咨禹汝平水土惟時懋哉司空掌邦土居四民時  
地利周官司空執度地居民山川沮澤時四時量地遠近與  
事任力記王制危東六星兩兩而比曰司空春秋元命苞度量  
不審舉事失理都鄙不脩財物失所則飭司空家語凡營城起  
邑浚溝洫脩墳坊之事則議其利建其功凡四方水土功課歲  
盡則奏其殿最而行賞罰凡郊祀之事掌掃除樂器大喪則掌  
將校復土凡國有大造大疑諫諍與大尉同後漢百官志本注

下理坤道上和乾元為司空漢官解詁司空主土不言土而言空空尚主之况於實乎白虎通使國無枉理法錯刑清事均民聚者謂之司空古今通語

詩句司空見慣渾閑事惱殺蘇州刺史腸杜牧

古今事實

物得其所

魯定公以孔子為司空乃別五土之性而物其所生之宜咸得厥所家語

經為儒宗

漢師丹為大司空策免唐林上疏曰丹經為世儒宗德為國黃者海內未見其大過免爵太重京師識者咸以為宜復爵邑使

秦朝請

內亞三夷

齊孔稚圭為王敬則讓司空表曰故李通豪贍以親寵登用王基才勇以聲華入選先帝擢臣以榮華陛下申臣以富貴遂得北帶五州東跨六郡內亞三夷外齊四岳蟬佩之映則左右交輝龜組之華則縱橫吐耀輕輪徐動則劍騎如雲飛蓋暫停則歌鐘成列縱金龍吹鬱其前鳴笳鳳管疊其後鄧禹若不滿漢光則南陽之掾史微臣若不逢明主則孤城之戍客豈可加以正台之席登以論道之寄啟黃扉而燮五緯躡青帷而調四序

職班三事

梁劉孝儀為臨川王解司空表曰臣以庸薄謬竊隆重職班三



事任總六條衣衾坐視既闕論道馳傳慈棠尤慙為政而俯司土地仰燮陰陽今水沴乃作旱魃為災乞降茲台步協此天人

才行授官

唐長孫無忌策拜司空固辭不許又因高士廉奏曰臣幸居外戚恐招聖主私親之誚敢以死請太宗曰朕之授官必擇才行若才行不至縱朕至親亦不虛授襄邑王神符是也若才行所適雖怨讎不棄魏徵等是也朕若以無忌居后兄之愛當多遺子女金帛何須委以重官蓋是取其才行爾

忠勤具望

晉荀蕃為司空劉琨奏曰司空荀蕃朝廷之舊官繼世忠勤乃心皇家具瞻之望唯蕃而已宜增位號授分陝之重

在功臣右

漢竇融拜冀州牧十餘日遷大司空融自以非舊臣一旦入朝在功臣之右召會進見容貌辭氣卑恭已甚帝以此愈親厚之得大臣節

漢牟融經明才高善論議顯宗數嗟嘆以為才堪宰相明年代伏恭為司空舉動方重甚得大臣節

儒雅有畧

晉張華彊記默識四海之內可指諸掌拜司空儒雅有畧畧盡忠匡輔雖聞主虐后之朝而海內晏然華之功也

儒者為榮

漢伏恭為太僕帝臨辟雍於行禮中拜恭為司空儒者以為榮

斷斷守善

漢謝弼上封事曰今之四公惟司空劉寵斷斷守善餘皆素餐

不為苛碎

後魏伊馥拜司空及為三公清約自守為政舉大綱而已不為

苛碎

不修威儀

漢第五倫為司空奉公盡節言事無依違諸子或時諫止輒叱

遣之吏人奏記及便宜者亦併封上其無私如此性質少文采

在位以清白稱時人方之貢禹然少醞籍不修威儀亦以此

不求名譽

漢任隗拜司空義行內修不求名譽以沉正見重於世

削封事藁

漢陳羣司空前後數密陳得失每上封事輒削其藁時人及其

子弟莫能知也論者或譏羣居位拱默羣覺正始中詔選群臣

上書以為名臣奏議朝士乃見羣諫事皆歎息焉

上諫獵疏

王朗為司空文帝頗出遊獵或昏夜還宮朗上疏諫帝報曰覽

表雖魏絳稱虞箴以諷晉悼相如陳猛獸以戒漢武未足以喻

方今二寇未殄將帥遠征故時入原野以習戎備至於夜還之

戒已詔有司施行

掃第以待

趙瑤自扶風太守來之郡司空張溫謂曰第五伯魚從蜀郡為

司空今掃吾第以待足下

去籍通客

陳寵為司空府故事以吏至時自公以下督屬籍不通實客以防交關寵去籍通客以明無所不受論者大之

家無貨產

宋弘為大司空所得租俸分贍九族家無貨產以清行致稱

不營產業

晉司空王基著德立勳治身清素不營產業身沒行顯足用勵俗詔以奴婢二人賜其家

員郎更直

唐裴寂策司空遣尚書員外郎一人每日更直寂第其見崇貴

如此太宗祠南郊命寂與長孫無忌同昇金輅寂固辭讓太宗曰以公有佐命之勳無忌亦宣力於朕同載參乘非公而誰遂同乘而歸

金輅同昇 見前

白衣三公

漢荀爽董卓秉政徵之起巖穴九十五日而為司空時號為白衣登三公

列侯三公

魏司空闕孟康奏坊見司隸校尉崔林稟自然之正性體高雅之宏量論其所長以比古人忠直不回則史魚之儔清論守約則季文之匹遂為司空封安陽亭侯三公封列侯自林始也

便令掃除

五代馮道入朝拜司空唐制三公為加官無單拜者或云三公正宰相便合參大政又云合兼授又云祭祀時便令掃除道聞之曰司空掃職也吾無所憚既而知非乃止

願上印綬

漢彭宣自御史大夫轉為司空會王莽為大司馬秉政專權宣上書言年齒老鈍數伏疾願上大司空長平侯印綬乞骸骨歸鄉里

立學士班

宋天禧四年以資政大學士太保致仕王欽若為司空職如故時欽若求侍東宮講誦以輔世兼領三少品序非便表求猶秩

乃有是命止立學士班

非賞勞臣

宋熙寧二年宰臣曹公亮司徒兼侍中韓琦提舉兩朝實錄乞有不推恩上以為有例而公亮奏臣當遷司空琦太保三公非賞勞之臣從之

古今文集

雜著

除文彥博守司空依前樞密使加食邑實封制

王珪

朕若稽先王維御羣臣左謀金鉉之老以經治於廟堂右屬鴻樞之良以定策於帷幄厥有成績可勿褒乎具官某風力肅明

器資恢傑臨至劇有轉圜之易定大謀如執主之堅速事神文  
之朝已緝熙於鼎路追言聖考之遇又密勿於機廷肆涼昧之  
不承會精神於羣慮雖兵民之異本亦文武之交脩未隆贊冊  
之恩暑懋圖庸之舉其保安父允釐華陽顧豈名位之私終繫  
老成之助于戲有若闕天尚迪文王之彝罔俾阿衡以專商家  
之美往篤爾烈永承于休

除呂公著守司空同平章事制

蘇軾

仁莫大於求舊智莫嚴於用衆既得天下之大老彼將安歸以  
至國人皆曰賢夫然後用今朕一舉仁智在焉宜告治朝以孚  
大號具官某訃謨經遠精識造微非堯舜不談昔聞其語以社  
稷為悅今見其心三年有成百揆時叙維乃列考相予昭陵益

清淨以寧民亦勞謙而得士凡我儀刑之老多其賓客之餘在  
武丁時雖莫追於前列作召公考固無易于象賢而乃屢實封  
童力求退避朕重失此三益之友而閔勞以萬機之煩是用遷  
平土之司釋文昂之任毋廢議論時遊明堂於戲大事雖咨于  
房喬非如晦莫能果斷重德無逾於郭令而裴度亦寄安危罔  
俾斯人專美唐世

除司空呂公著上表辭免不允批荅 蘇軾

夫國以得人為彊如猛獸之衛藜藿以積賢為寶如珠玉之茂  
山川湛然無為物自蒙利故崔公發議則淄青慙服知朝廷之  
有人蜀使抗詞則孫權回顧歎張昭之不在得失之效豈可同  
旨而語哉朕之用卿意實在此國計之重可無復辭

律詩

挽宋司空

歐陽永叔

文章天下無雙譽。伯仲人間第一流。出入兩朝推舊德。周旋三事著嘉謀。從容進退聲名泰。寵錫哀榮禮數優。棠棣從來敦友愛。九原相望接松楸。

開府儀同三司

歷代沿革漢文帝元年用宋昌為衛將軍位亞三司。章帝建初二年使車騎將軍馬防班同三司。三司之名始此。殤帝延平元年鄧騭為車騎將軍儀同三司。儀同之名始此。魏黃權以車騎將軍開府儀同三司。開府之名始此。晉羊祜為車騎將軍開府如三司之儀。自是以後又有如開府同三司之儀者。

自祐始馬宋太宰已下至光祿大夫開府者為文公太司馬以下至諸將軍開府者為武公。梁置位次三公從一品。隋開皇中以為四品散官煬帝改為從十品。同漢魏之制。位次王公。唐武德改為輕車都尉。後以開封儀同三司為文散官。雖三公三師亦必冠以此號。宋因唐節度使兼平章事號使相。元豐定官制既罷同平章事遂以節制開府為使相而文武寄祿官亦存之。元開府儀同三司從一品。

羣書要語

階極儀

推相嚴震墓誌

聖王納制九命俾尊於開

府唐大詔令

開府崇階視儀上宰

曲阜行燕達贈使相制

班同

衮章

齊王儉拜儀同三司章

位次王公

隋宜進秩於八命儀亞

槐庭

常衮制

班同三事

東觀記

位逾九卿

班同三府

袁宏漢紀

禮隆八命秩比三公常衮加杜見儀同制秩視三公南窓記神

夢紫霄心飛丹掖品同儀比視鉉莫殊王僧孺代表心馳紫路

登文右而莫由目送白雲拜承明而未集江總謝儀同三司表

開府之榮名重矣矧優其禮命視於文品為第一南豐擬制臣

宅慶紫霄聯休皇極地均棲月既無迹以成高仕若乘風故不

行而自遠論其才望有愧茂弘先佩印綬常羞叔度梁庾肩吾

武陵王拜儀同章

詩句清新更開府杜開府當朝傑杜

古今事實

歷勳文武

晉泰始八年詔曰衛將軍羊祜歷文武有佐命之勳其為車騎

將軍開府如三司之儀

著信蠻夷

隋何稠為散騎常侍安集嶺南欽州刺史有猛方欲為逆至是

請身入朝稠與之約請京師後猛入朝上大悅曰何稠著信蠻

夷乃至於此以勳授開府國史補

開居俸給

開元以前舊例開府特進雖不帶事皆給俸祿與朝會皆當官

盛德罷劇就閑者居之

不以名稱

宋璟不以名稱止曰宋開府

班同衮章

事類彙編

位登衮職

徐孝嗣加儀同三司孝嗣聞詔歛容謂左右曰吾德慙古人位登衮職將何以堪之固辭不受

寵賜帳褥

晉太始七年以鄭袤為司空稱疾上送印綬至于十數久之見許以侯就第拜儀同三司置舍人官騎賜牀帳簾褥錢五十萬

詔賜几杖

蔡謨免皇太后詔以謨為左光祿大夫儀同三司遣謁者孟洪就加冊命謨上疏陳謝遂以疾篤不朝詔賜几杖門施行馬

令乘輅服

李賢遷開府儀同三司太祖西巡至原州幸賢弟讓齒而坐行鄉飲酒禮其後又至原州令賢乘輅備服儀以諸侯會遇禮相見然後幸賢第歡宴終日凡是親族頒賜有差

夢升台鉉

陳章昭達字伯通寶應初授鎮前將軍開府儀同三司初文帝夢昭達升台鉉及旦告之至是侍宴酒酣顧昭達曰卿憶夢否卿何以償對曰臣當效大馬之勞以盡臣節自餘無以奉償

疇其勲績

元康詔中書監光祿大夫張華歷世腹心情所馮賴故疇其勲績使儀同三司而虛冲挹損難違高志其以光祿大夫儀同三



司本職如故

不登台司

華廩為太子少傅甚得輔導之義河南尹韓壽賈后之妹夫欲以女配廩孫陶廩拒不許深以為恨故不登台司疾篤乃進位光祿大夫儀同三司

開府千餘

北齊後王驕縱無度諸濫得富貴者將數萬人庶姓封王者百數開府千餘儀同無數馬及鷹犬乃有儀同之號鬪雞亦號

執笏百餘

隋高祖受禪李穆來朝高祖降坐禮之拜太師子孫雖禪祿必拜儀同其一門執笏百有餘人

古今文集

雜著

除皇弟似守太保充保平鎮安等軍節度使依前開府儀同三司蔡王制

曾肇

朕惟本朝之制厚公族之恩列第京師不使使之去國兼榮將相未嘗責以治民豈惟致敦敘之仁抑亦隆夾輔之勢矧吾宗弟實位真王念方屬於妙齡將即安於外邸雖云交邁能不夜懷肆舉徽章用乎群聽具官出神明之胃鍾祿祝之祥氣稟溫良生知遜揚雅受圖書之習夙堅忠孝之誠桐葉疏封已侈盤維之寄棟莖致好每敦和樂之私比遵朝著之趨尚處官隅之邃屢觀啓奏祈避禁嚴志雖莫回情實未忍思在宗之誼宜忘

原隰之哀，顧開府以時難廢國家之典，迺獨毅且增峻官儀，更兩鎮之節旌，正三師之位敘，兼陪并賦，益壯宗藩於戲周誥。孟侯則曰：無康好逸，漢詔諸子亦云無適宵人，蓋位不期驕者，人情之常，寵至益戒者，前哲所尚，往服休命，求綬令名。

古詩

投贈哥舒開府翰二十韻

杜甫

今代麒麟閣，何人第一功。君王自神武，駕馭必英雄。開府當朝傑，論兵邁古風。先鋒百勝在，畧地兩隅空。青海無傳箭，天山早掛弓。廉頗仍走敵，魏絳已和戎。每惜河湟棄，新兼節制通。智謀番虜想，出入冠諸公。日月低秦樹，乾坤繞漢宮。胡人愁逐北，宛馬又從東。受命邊沙遠，歸來御席空。軒墀曾寵鶴，畋獵舊非熊。

茅土知名數，山河誓始終。策行遺戰伐，契合動昭融。勲業青冥上，交情氣槩中。未為珠履客，已見白頭翁。壯節初題柱，生涯獨轉蓬。幾年春草歇，今日暮途窮。軍事留孫楚，行間識呂蒙。防身一長劍，將欲倚崆峒。

律詩

上開府

范純仁

三紀中書更有誰，致君堯舜似皇夔。頻年力請方歸第，天子臨軒冊大師。

特進

歷代公董漢制，諸侯功德優盛。朝廷所敬異者，賜位特進。位在三公下，故曰特進。自宣帝用太子外祖許廣漢為平恩侯，位

特進而特進之名始見於此其後或領城門兵得舉吏如五  
 府王商或見禮如丞相得置從事史張禹或給事中視尚書  
 事薛宣或奉朝請傅喜或議大政張禹其職不一後漢皇后  
 兄弟率為特進侯一漢及魏晉以為加官元康中惠帝定令  
 特進位次諸公在開府驃騎上晉時位從公陳因之後魏  
 容用人皆以舊德晉文帝以為散官不治事煬帝廢為文  
 散官雖不帶職事皆給俸祿得預朝會班列依本品之次皆  
 崇官盛德罷劇就閑者居之宋元豐新制改尚書左右僕射  
 為特進居文階之首大觀著令非宰相不除大觀三年修成  
 中書敕令格式四十卷諸非宰相不除特進政和間薛昂以  
 觀文殿學士白時中以門下侍郎並帶特進繼改金紫光祿

大夫今後非宰相不得除官制舊典除政非宰相不除特進  
 大觀已有此法非起于政和也  
 元開府儀同三司之下有

特進

廬書要語特進以加文武之德齊者隋百官志一品崇階謝國

策制諸侯勲德之盛則就加特進以寵之李光顏除特進制位

次三公居驃騎儀同之上非茂勲俊德曷以處之李德裕集神

策劉公神道朝位特見劉阮特進制特進崇班自共冠諸侯之

上馮延巳制大見信用魏特進仍踐其位赫赫三事躬佩其

綬曷日太平張九齡上姚令公書

古今事實

位次三公

後漢樊宏位特進次三公

榮亞三公

李德裕謝加特進狀漢制進以文冕列侍清祠榮亞三公品居第二自非學深張禹功重實融則何以膺是寵章

尊為國師

謝承後漢書云趙典尊為國師位特進寢則布被瓦器而食

為天子師

張禹雖居家以特進為天子師國家每有大政必與定議漢書

進達名士

曹勝加位特進其所進達皆海內名士

極言進諫

陰識拜執金吾位特進八則極言正諫至與賓客語不及國事慕仲山甫匪躬之節所用掾吏皆天下俊哲司馬彪後漢書

特見優禮

後魏刁雍拜特進以年高特見優禮

特賜安車

後漢梁適位特進賜安車駟馬

古今文集

律詩

贈特進汝陽王

杜子美

特進羣公表天人夙德升霜蹄千里駿風翮九霄鵬學業醇儒富辭華哲匠能筆飛鸞登立童罷鳳鸞騰

新編古今事文類聚新集卷之四

新編古今事文類聚新集卷之四

南江 富大用 特可 編

金陵 唐富春 子和 刊

省官部

尚書省

歷代沿革 尚書省 猶唐虞大麓之職也 書納於大麓 王肅注云 堯納舜於尊顯之官 大錄萬機之政 周官司書鄭玄云 若今尚書 秦時少府遣吏四人在殿中主發書 故謂之尚書 尚猶主也 有尚書令 尚書僕射 尚書丞 至漢 武帝時 左右曹諸史分平尚書奏事 知樞密者 始領尚書事 昭帝時 霍光以大將軍領尚書事 成帝初 王鳳以大司馬 師丹以左將軍 並領尚

書事。後漢章帝以太傅趙熹太尉牟融並錄尚書事。尚書有錄名自熹始。和帝時太尉鄧彪為太傅錄尚書事。位上公。在三公上。漢制遂以為常。每少帝立則置太傅錄尚書事。猶古冢宰總已之義。魏輒罷之。漢初尚書雖有曹名。不以為號。及靈帝以待中梁鵠為選部。於是始有曹名。總謂之尚書臺。亦謂之中臺大事。八座連名而有不合。得建異議。一漢皆屬少府。魏晉以後亦公卿權重者為之。自置中書省。有監令。掌儀衛之任。而尚書之權漸減矣。宋曰尚書寺。居建禮門內。亦曰尚書省。亦謂之內臺事。梁陳舉國機要悉在中書。獻納之任。又歸門下。而尚書但聽命受事而已。後魏天興元年置六部大夫於皇城。四方四維以擬八座。謂之八國。各有屬官。分尚

書二十六曹。及諸外置。令大夫主之。四年又復尚書二十六曹。天賜元年後罷別置武歸修勤二職。分主省務。神麈元年始置僕射左右丞。及諸曹尚書十餘人。各居別寺。北齊尚書省亦有錄令僕射總理六尚書事。謂之都省。亦謂之北省。後齊北王以太子監國立大都督府。與尚書省分理眾事。仍開府置佐。後周無尚書。隋高祖時尚書省事無不總。置令左右太僕射各一人。總吏部禮部兵部都官度支工部等六曹事。是為八座。屬官左右丞各一人。都事八人。分司管轄。唐制略同。尚書省都堂居中。左右分司。堂東有吏戶禮三行。每行四司。左司統之。西有兵刑工三行。每行四司。右司統之。凡二十四司。分曹共理。而天下之事盡矣。龍朔二年改尚書省為中臺。

咸亨初復舊光宅元年改為文昌臺垂拱元年又改為都臺  
咸通初復舊長安三年又改為中臺神龍初復為尚書省亦  
謂之南省宋朝尚書省掌六曹諸司文書施行制命舉省內  
紀綱程式正御史糾不當者聽內外枉屈辨詐凡六曹不能  
決者總而決之元參用古制建尚書省總領紀綱儀刑端  
禁置尚書令左右丞相及平章政事二人任宰相之職掌丞  
天子平章萬機其屬有左丞右丞及參知政事二人執政之  
官為宰相之貳佐治省事又有左司掌總察吏戶禮三部受  
事付事右司掌總察兵刑工三部受事付事二司各有郎中  
員外郎都事等員在外別置行省

尚書職居天官政化  
漢謝朓表  
履書受語輔位明堂遺象麟閣

之本南齊詔尚書百官之本國家樞機六典尚書萬事之本王

化所由宜參貳親賢以康庶政晉穆帝詔天下樞要在於尚書

章彪傳文昌天府晉百官表注堯試舜於太麓者領錄天下事

如今之尚書宜得大賢乃可使處議持平焉桓譚新論陛下之

有尚書猶天之有北斗也斗為天喉舌尚書為陛下喉舌斗斟

酌元氣運平四時尚書出納王命賦政四海東漢李固疏

詩句尚書北斗尊顏真卿集德履星辰北斗寒三能只隔片雲

間周家冢宰均四海漢制尚書本百官楊誠齋詩

古今事實

都堂居中

唐制尚書省都堂居中左右分司堂東西凡二十四司分曹共

事文類聚新集 卷之四

事文類聚新集  
卷之四  
理詳見前沿革

制勅用黃

唐高宗時勅曰制勅施行既為永式比用白紙各有蟲蠹自今尚書省頒下諸州縣並用黃紙

百官總已

太尉鄧彪元勳之族三讓彌高海內歸仁為羣賢首聰明康強可謂老成人矣其以彪為太傅錄尚書事百官總已以聽漢和帝策書

三公絕席

張禹拜太傅錄尚書鄧太后以殤帝初育欲令重臣居禁內乃詔禹舍宮中給帷帳牀褥太官朝夕進食五日一歸府每朝贊

與三公絕席

謹慎周密

前漢張安世拜太司馬車騎將軍領尚書事職典樞機以謹慎周密自著外內無間嘗有所薦其人來謝安世以為舉賢建能豈有私謝邪絕弗復通有郎功高不調自言安世應曰君之功高明主所知人臣執事何長短而自言乎絕不許已而郎果遷又幕府長史遷辭去之官安世問以過失長史曰將軍為明主股肱而士無所進論者以為譏安世曰明主在上賢不肖較然臣下自脩而已何知士而薦之其匿名迹遠權勢如此本傳

中正弘遠

晉元康元年詔司徒王渾秉德中正識量弘遠歷位內外文武



事類彙編卷之四  
勲庸著在方策宜參弼機衡以亮天工其令錄尚書事晉書

三人參錄

太尉趙峻二世掌典機衡有匪石不貳之心太司農李固公侯之苗忠直不阿有史魚之風今以峻為太傅固為太尉與大將軍冀參錄尚書事

東西二錄

晉宗室會稽王道子進位丞相錄尚書假節都督中外諸軍事勢傾天下道子世子元顥又加錄尚書事道子政無大小委元顥時謂道子為東錄元顥為西錄

典職六年

童帝詔曰司空牟融典職六年勤勞不怠其以牟融為太尉錄

尚書事

典樞十年

孔光領尚書事凡典樞機十餘年守法度修政事不希旨苟合志誅曹節

竇后臨朝以陳蕃為太傅錄尚書事蕃與后父大將軍竇武同心盡力徵用名賢共參政事志誅常侍曹節等以其誦事太后多行貪虐天下之士莫不延頸相望太平及事漏曹節矯詔誅武等蕃遂見害

耻為魏臣

魏揚彪為太尉錄尚書事及李傕郭汜之亂彪盡節為主崎嶇危難之間幾不免於害見漢符命將終自以累世為三公耻為

魏臣遂稱足疾不復行積十餘年魏文帝即王位欲以為太尉令近臣宣旨彪辭曰嘗以漢朝為三公值危亂不能立尺寸之益若復為魏臣於國之選亦不為榮也帝不奪其意

劔履上殿

汝南文成王亮為太宰錄尚書事入朝不趨劔履上殿增祿屬十人與太保衛瑾對掌朝政

讚拜不名

晉泰和元年詔會稽王朕承洪緒乃聞善誘慎徽五教儀刑具瞻其以尊為丞相錄尚書事入朝不趨讚拜不名劔履上殿給羽葆鼓吹班劔六十人

暴風拔木

北海王祥初遷大將軍錄尚書事祥已拜命其夜有暴風震電拔木倒立識者知其不終後魏書

天火示災

東晉元興元年舍下火是時指言用事出鎮姑熟名雖在外實遙錄尚書故天火示不復用也徽祥記

古今文集

雜著

尚書省謝車駕臨幸表

林希

天臺肇建具崇曠古之司帝車下臨增重陛簾之寄非常之舉視古無偏恭惟皇帝陛下天縱多能日新盛德剷除眾弊裁制萬微考先王之董治官立尚書以為政本紀綱條理見微旨

於新書初作規模別彼司於著位蓋履之積年而成於茲且聞諸前世而驗於方今忽紆清蹕之傳采登鴻都之觀且北辰居極外環象斗之官而黃道所經及積星之位瞻威顏於咫尺被法語之丁寧勅以在公退而交儆分曹即屬燦然周典之文望輦拜恩陋彼漢郎之嘆矧復宗藩旅進禁從相趨凡獲待於宸遊皆預窺於聖作歡聲載溢慶榮遇於一時信史傳書流美談於萬世臣等叨膺重任久負明恩顧懷構位之慙第劇逢辰之幸敢忘策勵期稱寵臨

尚書令

歷代沿革秦置令丞屬少府漢因之武昭之後其任稍重宣帝時任中尚書官元帝時弘恭石顯相繼為中書令元帝被疾

不親政事遂委任焉及蕭望之領尚書事知顯專權建言以為尚書百官之本國家樞機宜以通明公正處之武帝遊宴後庭始用官者非古制請罷中尚書中書與尚書奏事故連言之及光武親總吏職權歸尚書三公但受成事而已自魏至晉宋齊秩皆千石品並第二梁加秩中一千石班第十六陳加品至第一後魏北齊及隋品皆第一唐因之太宗初為秦王署尚書令其後人臣莫敢為遂廢其官其國政樞密皆委中書至代宗以親賢有大勳遂特拜尚書令五代梁開平三年詔升尚書令為正一品宋朝因之元尚書令一人正一品

羣書要語總百官之得失管王政之開塞者端右之職也晉書

國家司總括百揆憲範王猷式是群辟故必簡德而拔量才而受謝石疏百揆之首總參機衡出納朝政治績之所由也晉起

居注寵納大麓七政以齊內成外平風雨不迷補我衮闕闡我

王猷王猷允塞四海咸休雖聖雖明必賴良才無曰我智官不

能任發言如絲其出如綸千里之應樞機在身整虞尚書議平

原帶地資緒極天王或謝開封尚書令表揚職萬機總任百揆

權衡庶物準的群僚可以助日月之光華增天地之高厚北齊

刑子才謝表尚書掌出納王命敷奏萬機令總統之隋百官志

天府文昌萬方之數天官冢宰無所不統禮尊三獨事總百揆

江總議表昔之家司今日端揆同上司會治本冢宰朝端搢紳

所屬儀刑攸在同上八座比於文昌二丞方於管轄苟非稱職

竊位與譏劉自知北斗為天之喉舌尚書陛下之喉舌李固疏

八座之學百揆之首白帖

古今事實

端撰官

漢光武親總吏職天下事皆上尚書與入主參決乃下三府尚

書令為端撰之官

三獨坐

後漢尚書令主贊奏事總領紀綱無所不統與司隸校尉御史

中丞朝會皆專席而坐京師號曰三獨坐

能識亡書

前漢張安世以父任為郎天子行幸河東嘗亡書二篋詔問莫

能知唯安世識之後購求得書以相校無所遺失奇其材擢為尚書令

明習故事

漢侯霸字君房光武徵霸與車駕會壽昌拜尚書令時無典故朝廷又少舊臣霸明習故事收錄遺文條奏前世刑政法度有益於時者皆施行之○漢黃瓊字世英遷尚書令明習故事號為當贍

直言無撓

漢申屠剛為尚書令蹇蹇直言無所屈撓

駁議合意

後漢宋約為尚書令忠正直言數納策謀每駁議未嘗不合上

意本傳

臺閣舊習

漢黃香遷僕射月餘為尚書令增秩二千石上惜其幹用臺閣舊習遂見尊重香亦勤力憂公畏慎周密每月奏議所建畫未見流布者

宮闕故事

陳忠為尚書令數進忠言辭旨弘麗前後所奏悉條於宮闕為故事

言曰切直

任昉為尚書令職典樞機竭忠於國數條便宜譏刺時政以補闕失言曰切直

清儉履道

晉太熙元年詔曰夫總百揆之得失管王政之開塞者端右之職也自漢以來每選此官常慎其人議郎王戎清儉履道唐黜已著于已試其以戎為尚書令

頭軛輿輪

後漢申屠剛遷尚書令光武嘗欲出遊剛以隴蜀未平不宜宴安逸豫諫不見聽遂以頭軛乘輿輪遂止

諫回帝車

陳矯為尚書令明帝幸至尚書門矯問曰陛下欲何之帝曰欲案行文書爾矯曰此臣職分非陛下所宜臨若不稱職則請就死帝慙回車

不接賓客

陳蕃為豫章太守性方峻不接賓客徵為尚書令送者不出

不阿豪勢

楊惟拜尚書令平心正直選舉高妙進善嫉惡不阿豪勢

皆慎選舉

左雄為尚書令限年四十九先試經然後舉孝廉故雄為令在位者各肅清時稱曰左伯豪為尚書天下皆慎選舉

每擢英俊

衛良拜尚書令每當選舉拔擢天下英俊及二千石長吏功次者用之

剪邪截曲

劉祐拜尚書令正身機密剪邪截曲不撓狂臣  
旌賢退惡

羊陟拜尚書令明審選舉旌賢退惡

治身無嫌

察匡正

唐約字仲謙拜尚書令自典樞機數有直言美策以補益上上  
每作表疏皆手自書之處官任職不言貨利之事當公執法不  
阿所私京師號曰治身無嫌唐仲謙

厥德仁明

郭賀字喬卿為尚書令百姓歌之曰厥德仁明郭喬卿忠正朝  
廷上下平

號為清能

呂文字季陽代董九為尚書令庶事無留門無停賓又歷職內  
外治身儉約為政不煩號為清能然持法刻深外用俗吏故聲  
名損於郡縣時

為世名公

晉裴秀為尚書令創制朝儀廣陳刑政朝廷多遵用之以為故  
事在位四載為當世名公

一令君美

荀彧守尚書令課試令史以下覈其才能有闡於文法不能決  
疑處事者即時遣出帝嘗謂曰魏武帝言荀文若之進善不進  
不止荀公達之退惡不退不休二令君之美亦望於君也

二百猶香

荀彧為尚書令持節特堅坐不累席其在臺閣不以私意撓公  
劉季和嘗曰荀令君至人家坐處三日香

焚毀故案

魏荀彧為尚書令嘗以書陳事臨薨皆焚毀故案奇策密謀不  
得盡聞非正道不用名重天下莫不以為儀表海內英俊咸

停滯庶事

蜀費禕字文偉代蔣琬為尚書令時戰國多事眾務煩猥禕識  
寤過入每省讀書記舉自覽視已究其意旨其速數倍於人終  
亦不忘嘗以朝晡聽事其間接納賓客嬉戲博奕每盡人之歡  
事亦不廢董允代禕為尚書令荀日之間事多停滯允乃嘆曰  
人才力相懸若此非吾所及

飛白題壁

宋王僧虔為尚書令為飛白書題尚書壁曰圓行方止物之定  
質修之不巳則溢高之不巳則躓引之不巳則遺是故去之宜  
疾當時嗟賞以比座右銘

高蟬趨帳

梁何敬容為尚書令專預機密後以罪免職復為金紫光祿大  
夫未拜又加侍中敬容舊時賓客門生喧譁如昔會稽謝郁致  
書戒之曰昔君侯納言加首鳴玉在腰回豐貂以步文昌登高  
蟬而趨武帳不以此時薦才拔士少報聖王之恩今人猶有踵  
君侯之門者未必皆感惠懷仁冀君侯之復用也君侯宜杜門  
念矣無有所通



賜劔書名

鄧壽為尚書令壽為僕射章帝賜諸尚書劔惟壽等二人手自著姓名尚書令韓稜楚龍淵僕射鄧壽

乘車就席

齊謝朓徵為司徒尚書令朓辭脚疾不堪謁仍角巾自輿詣雲龍門既見乘小車就席

儀體王立

山濤啟事尚書令李胤遷處缺宜得其人征南將軍羊祜體儀王立可以整肅朝廷

尖頭筆公

後魏古弼為尚書令太武大閱將校獵於河西弼留守詔以肥

馬給騎入弼命給弱者太武大怒曰尖頭奴敢裁量朕也還臺先斬此奴弼頭尖太武常名之曰筆頭時人呼為筆公屬官惶怖懼誅弼告之曰吾謂事君使田獵不過盤遊其罪小也不備不虞使我寇次逸其罪大也今北狄孔熾南虜未滅校馬之志窺伺邊境是吾憂也故選肥馬備軍實為不虞之慮苟使國家有利吾寧避死乎太武聞而嘆曰有臣如此國之寶也

何為復讓

晉王述每得官無所辭為尚書令子坦之勸讓述曰汝言我不堪邪坦曰非也但克讓自是美事耳述曰既云堪何為復讓

復表不受

唐代宗以郭子儀為尚書令子儀讓以太宗昔居此官累聖相

承曠而不置。詔不允。勅令宰相百官於尚書省送上子儀復表。讓不受。

空國忤意

桓溫素忌嚴浩。因其北征軍敗。乃上疏請穢浩於荒裔。竟坐廢。為庶人。後溫復欲以浩為尚書令。遣書告之。浩欣然許之。將答書。慮有謬誤。開閉者數十。竟遺空函。大忤溫意。因是遂絕。

書名見嘲

何敬容為尚書令。貪恠為時所強鄙。其書名敬字。則大作苟小。為文容字。則大為父。小為口。陸隍戲之曰。公家苟既奇大。父亦不小。敬容遂不能答。又為漏禁中語。故嘲諷。且至嘗有客姓吉。敬容問。卿與郎吉遠近。客答曰。如明公之與蕭何。

古今文集

雜著

除呂蒙正尚書僕射制

邦國政治。益出於中樞。朝廷紀綱。盡歸於會府。矧乃端揆之任。聿居師長之崇。苟非台鉉之賢。曷慰搢紳之望。具官呂蒙正。挺生英氣。符合昌期。自先夢卜之求。遂荷鹽梅之寄。謨明匪懈。亮直不渝。爰自天官。再持政柄。洎和門實時。維老成朕欽。若不圖建用。皇極雖彌。綸大體固未協於康哉。而勵翼小心。亦備觀於勤止。頗鬱隆年之望。且均勞逸之功。長是中臺式茲百辟。

行尚書省

見後行省



改中書省曰紫微省時謂尚書省為南省門下中書省為北省亦謂門下為左省中書省為右省或通謂之兩省中書省掌進擬庶務宣奉命令除授省臺寺監長貳館閣帶職提舉官已上臺諫章奏臣僚陳請與革廢置及內外取旨之事又有尚書省門下省謂之三省元初有尚書省續以中書省為都省有中書令右丞相左丞相平章重事平章政事右丞左丞參知政事簽書省事斷事官左右司郎中員外郎都事管勾承發司照磨經歷知事管勾在外又置行中書省至元二十四年復改為尚書省

古今事實

有瑞柳樹

呂潛授禮部侍郎中書省有柳樹建中末枯歿興元元年車駕

還京後其樹再榮人謂之瑞柳樹滑試進士取瑞柳為題上聞而嘉之

謂鳳凰池

中書省地在樞近多承寵任是以人固其位謂之鳳凰池通典

為東西臺

治平二年祖無擇言門下中書與尚書二省其長官皆宰相之任今乃左省在西右省在東不可乞將中書省與門下省對移唐龍朔中嘗改左右省為東西臺

曰左右曹

漢應邵官儀曰左右曹受尚書事前世文士以中書在右因謂中書為西曹又稱西掖

古今文集

古詩

贈徐幹詩

劉楨

誰謂相去遠，隔此西入垣。拘限清切禁，中情無由宣。

直中書省詩

謝玄暉

紫殿肅陰陰，彤庭赫弘敞。風動萬年枝，日華承露掌。玲瓏結綺  
錢，深沈映珠網。紅藥當階翻蒼苔，依砌上。茲言翔鳳池，鳴珮多  
清響。信美非吾室，中園思復仰。明情已鬱陶，春物方駘蕩。安得  
凌風翰，聊恣山泉賞。

中書郎詩

卜伯玉

大方信包含，優渥遂不已。躍麟龍鳳池，揮翰紫宸裏。

行省

歷代沿革自魏晉有之，謂之行臺。魏末晉文帝時，諸葛誕散騎

常侍裴秀尚書僕射陳泰黃門侍郎鍾會以行臺從。晉永嘉  
四年東海王越帥眾許昌以行臺自隨。後魏亦置行臺。孝武  
永熙三年罷諸行臺，尋詔復以渤海王高歡為大行臺，隨機  
裁處。齊亦皆隨雅制而置，負焉。隋置行臺省，有尚書令僕  
射都事侍郎等，負蓋隨其所管之道置於外州，謂之行臺尚  
書省。唐武德初以諸道軍務事繁，分置行臺尚書省，負觀以  
後廢。後諸道只各置採訪等使，兼判尚書事，蓋行臺之遺制  
也。宋無行臺省。元外道置行省，有左右丞參政，僉行省斷  
事官，同僉省。各議郎中負外郎都事照磨管勾。

羣書要語匡維將士鎮撫疆場儲積器用愛活黎民隱若敵國  
顏氏家訓張道携為晉州行臺左丞

古今事實

理邊民寬

北齊武定八年辛術為東南道行臺東徐州刺史郭志殺郡守  
文宣聞之勅術曰江淮初附百姓難向京師留卿為行臺欲理  
邊民寬枉監理牧守自今以後所統十餘州地諸有犯法刺史  
先啓聽報以下先理後表齊代行臺兼總民事自術始也

有王佐才

北史蘇綽為周文帝行臺郎中在官歲餘未見知臺中咸稱其  
能僕射周慧達稱其有王佐才時文帝與公卿往昆明池觀魚

至漢故蒼池顧問左右莫有知者或曰蘇綽博物乃召問綽應  
對如流文帝嘉之乃令綽並馬至池及夜還留綽問以政道臥  
而聽之文帝乃起整衣冠危坐不覺膝之前席語遂達曙詰朝  
謂周惠達曰蘇綽真奇士也即拜大行臺左丞參典機密自是  
寵遇日隆

辨槽解圍

獨孤永業後主時為河陽道行臺僕射洛州刺史周武帝親攻  
金墉永業出兵禦之曰是何達官作何行動周人曰至尊自來  
主人何不出看客永業曰客行急速是故不出乃連夜解馬槽  
二千周人聞之以為大將軍至乃解圍去

備艇全橋

北齊張亮為行臺左丞高仲密之叛也與斛律金守河陽周太祖於上流放火船燒河橋亮乃備小艇百餘艘皆載長鑣鑣頭施鉤火船將至即馳小艇以鈎鈎之分鑣向岸船不得及橋之獲全亮之力也

專制河南

侯景為南道大行臺位司徒言於神武曰恨不得兵三萬橫行天下要須濟江縛取蕭衍老翁以作太平寺主神武壯其言使擁兵十萬專制河南杖住若已之半體

拜鎮東都

屈突通判陝東道行臺左僕射時從討王世充世充平論功第一拜陝東道大行臺右僕射鎮東都

中書令

歷代沿革周官內史掌王之八柄掌書王命蓋其任也漢有中書謂者令丞屬丞府自武帝游宴後庭始用宦者典事尚書謂之中書謂者置令僕射司馬遷被腐刑之後為中書令即其任也宣帝任中尚書官皆宦者為令僕射元帝亦以宦者為中書令謂中人為無外黨遂委以政事事無大小皆決之成帝改中書謂者令曰中謂者令罷中書臣者更以士人為之後漢省獻帝時魏武為魏王置秘書令典尚書奏事此又中書之任也魏黃初初置中書令為秘書改公為監典尚書奏事又置監與令各一人秩並千石而中書典尚書奏事若密詔下州郡及邊將則不由尚書權自此重矣晉監令並第

三品掌贊詔命記會時事典作文書舊尚書并掌詔奏故有中書官而詔悉由中書也東晉更重其職多以諸公領之中興之後以中書之任併入散騎省後復置之宋齊亦置監令宋中書監令並增秩至二千石陳因之以中書分為二十一局各掌尚書諸曹總國機要而尚書唯聽受而已後魏置監令各一人監為正一品令為正二品北齊依魏後周依周官春官府置內史中大夫二人掌王言蓋比中書監令之任後又增為上大夫隋文帝廢三公府僚令中書令與待中知政事遂為宰相之職煬帝十二年改為內書省唐武德初為內史省龍朔二年改令為右相光宅二年改內史開元初改紫微令宋中書令正十品以檢校官兼中書令謂之使相宋初

未定官制前異姓未有兼中書令者惟贈官有之太祖太宗時加中書令者惟趙普一人元中書省有中書令為宰相之職掌承天子平章萬機

羣書要語掌軍國之政令緝熙帝載統和天人入則告之出則奉之以釐萬邦以度百揆蓋以佐天子而執大政者也唐六典璧門天達鳳沼神深絲綸王言出納帝命宋謝莊議中書令表職掌詔命王獻之中書令啓

古今事實

銅印軺車

晉制中書令銅印墨綬進賢兩梁冠絳朝服佩水蒼玉乘軺車鳳閣鸞臺



自隋唐以來除改百官必有詔勅而其制蓋須申中書門下首  
故劉樹之云不經鳳閣鸞臺何謂之勅

尊寵任職

前漢司馬遷既被腐刑之後為中書令尊寵任職

賢明選士

蕭望之以中書政事且以賢明之選自武帝遂宴後庭故用官  
者非因舊又違古不近刑人之義

朝端稱宜

太寧初肅祖詔溫嶠曰卿既以令望忠允之懷著於周旋且文  
清而旨遠宜居深密今特以卿為中書令朝端咸稱以為宜

貴倖傾朝

石君防與弘恭皆少年腐刑為黃門以選為中尚書宣帝時任  
中書官以恭為令君防為僕射恭歎君防為令貴倖傾朝

中書並掌

魏黃初中改秘書為中書以劉放為監孫資為令遂並掌機密  
歷文明齊王二世

中書專任

蔣濟字子通時中書監令號為專任濟上疏曰大臣太重者國  
危左右太新者身弊古之至戒也往者大臣秉政外內扇動陛  
下卓然自覽萬機莫不祗肅夫人臣匪不忠也然威權在下則  
衆心慢上勢之常也陛下既已察之於大臣願無忘於左右

中書五郎

晉諸公讚陳准為中書令張華為監與華俱處機密而推崇之  
每至直詔書無小大先示華方措意華得詔書不復示准放  
省中號准為中書五郎其從容如此

中書令公

高允為中書令魏文帝重之不名呼為令公

同車異車

晉記初中書令常同車入朝及和嶠為令首最為監嶠意高抗  
專車而坐乃使監令異車自此始

太令小令

晉陽秋中書王獻之卒以王珉為中書令世稱太王令小王令  
珉父洽永和為中書令至此珉復紹父人以為奕世令聞

可謂清官

敬季

晉王延之代張縉為中書令何偃嘆曰晉以子者李琰為此職  
今以延之代縉為之可謂清官後接之者實為未易

曰真忠臣

高允為中書令高宗禮敬甚重晨入暮出或積百居中朝臣莫  
知所論或有上書言得失者高宗省而謂群臣曰君父一也父  
有是非子何為不作書而諫之使人知惡而家內隱處也豈有  
以交親恐惡而彰於外地也今國家善惡不能面陳而上表顯諫  
此豈不彰君之短明己之美至如高允者真忠臣也

將授清顯

晉王洽為中書令年二十九將授之從兄胡之遺書曰弟今工

十九便居清顯要任敢不敬以先為弟格義讓之路焉若年至四五十之間雖復起登公輔亦非吾所豫况降此還者耶洽遂不拜

宜處機近

王珉傳詔曰新除侍中珉才學廣贍理識清通宜處機近以參時務其以珉為長兼中書令

親幸草屋

高允拜中書令司徒陸麗曰高允雖蒙寵待而妻子不粒高宗是日幸允第草屋數間布被緼袍高宗歎息久之曰古人之清豈有如此即賜帛五百疋北史

召付紙筆

徐光幼有文才年十二王陽攻頓立掠光令抹馬光但書柱作詩賦左右以白石勒勒令召光付紙筆光立作頌賜衣服遷中書令後趙錄

啓乞授子

晉諸公瓚華屢為中書監時多事不泄啓世祖乞授子蒼谷詔先時荀勗為中書監病風復使息暢書啓事皆前後相承以子弟管之

表乞除監

王道表曰臣表乞得中書監持節專一所司端誠保傳惟力畏視有詔曰昔荀勗從中書監為尚書令入賀之乃發憲曰奪我鳳凰池卿諸人賀我耶願足下處之勿疑

宰相參領

王獻之為中書令。啓瑯琊王為中書監。表曰：中書職掌詔命，非輕才所能獨任。自晉建國，常命宰相參領。中興以來，益重其任。故能王言彌敬，德音四塞者也。

內樞兼管

宋泰始起居注王言之職，總司清要。中將軍丹陽尹王景文夙尚弘簡，情度淹粹，忠規茂績，實資國道。且兼管內樞，以重其任。

平和有文

吳志：胡冲平和有文幹。天紀中為中書令。

言語辨捷

張向有俊才。孫皓時為侍郎，以言語辨捷見知，擢為侍中。中

風儀秀逸

後魏任城王澄為中書令。蕭順使庾華來見，澄音韻適雅，風儀秀逸。謂主客郎中張尋曰：往魏任城以武者，今以文見美也。

進止詳華

唐溫彥博遷中書令。突厥降，詔議所以安邊者。彥博請如漢置降匈奴五原塞，以為捍蔽。與魏徵廷爭，徵不勝其辨。天子卒從之。其後突厥可汗弟結杜謀反，帝始悔云：彥博善辭令，每問四方風臚，傳誥命若成誦。然進止詳華，人皆拭目觀焉。祖嘗宴群臣，遣秦王諭旨，既而顧左右曰：何如溫彥博？

若矢一臂

薛收子元超拜中書令，兼左庶子。帝幸東都，留輔太子監國。手

勅曰朕留卿若失一臂顧太子未習庶務關中事卿悉專之

為第一功

房元齡太宗即位為中書令第功班賞與杜如晦長孫無忌尉遲敬德侯君集功皆第一

執政事筆

裴炎輔太子是為中宗改中書令舊宰相議事門下省號政事堂長孫無忌以司空房元齡以僕射魏証以太子太師皆知門下省事至炎以中書令執政事筆故徙政事堂於中書省

介奸黨間

蕭至忠為中書令時宗楚客懷奸植黨而韋巨源楊再思李嶠務自安無所親正至忠介其間獨不詭隨時望翕然歸重帝亦

曰宰相中至忠最怜我

父子相失

崔湜拜中書令時父挹以吏部尚書得謝而性貪數為人請託以于湜湜多不從由是父子相失玄宗在東宮數幸其第申款密 ○妻子不粒 見前親幸草屋注

二頁相逼

初嘉貞在兵部而張說已為侍郎及皆相說位在其下議論無所讓故說不平未幾嘉祐拜金吾將軍兄弟要近人頗憚相帝幸太原嘉貞以職聞說論嘉貞素服待罪不謁遂出為幽州刺史說代其處嘉貞銜悔謂人曰中書令幸二頁何相逼如此

四俊見稱

嘉貞性簡疏。與人無疑。所薦中書舍人苗延嗣。呂太一。考功員外郎。負嘉靜。殿中侍御史崔訓。皆位清要。日與議政事。故當時稱曰。令君四俊。苗呂崔負。

倡封禪議

張說進中書舍人。倡封禪議。受詔與諸儒草儀。多所裁旨。

撰封禪頌

東封還為尚書右丞。兼中書令。詔說撰封禪壇頌。刻之太山。以夸成功。初源乾曜不欲封禪。說固請。乃不相平。及升山執事。官當從者。說皆引所厚。超階五品。從兵。惟加勲而不賜。眾怨其專。屏風隔坐。

紀騰景皇時為中書令。騰父亮為尚書令。每朝會。輒以屏風隔坐。

殿前再拜

太安元年。有胡人入雲龍門殿前。再拜曰。我當作中書監令。付都虞候治之。

創綠野堂

裴度徙東都。留守。加中書令。時闡豎擅威。天子擁虛器。縉紳道喪。度不復有經濟意。乃治第東都。集賢里。鑿山穿池。竹木叢萃。有風亭水榭。梯橋架閣。又於午橋創別墅。花木萬株。中起涼臺。署館號綠野堂。與白居易。劉禹錫。為文。黃把酒。窮晝夜相歡。不問人間事。而帝知度年雖老。而精神不衰。每大臣自洛來。必問度安否。開成三年。以病而還東都。真拜中書令。

進金鏡錄

進金鏡錄

張九齡為中書令時天長節百官上壽多獻珍異唯九齡進金鏡錄五卷言前古興廢之道上賞異之

衣錦書遊

魏元忠為右僕射兼中書令請歸鄉拜掃特賜錦袍一領銀十兩并給千騎四人充其左右手勅曰衣錦書遊在乎茲日散金敷惠諒屬斯辰

布衣位相

岑文本始為中書有憂色母問之荅曰非勲非舊責重位高所以憂也有來慶者輒曰今日受用不受賀或勸其營產業文本歎曰吾漢南一布衣徒步入關所望不過秘書郎縣令爾今無汗馬勞以文墨位宰相奉稍已重尚何殖產業耶故口未嘗言

家事既任職久資賜豐饒皆令弟文昭主之

力諫遜位

郝處俊遷中書令帝多疾欲遜位武后處俊諫曰天子治陽道后治陰德陽之與陰各有所主不相奪也况天下者高祖太宗之天下也陛下為子而守之不宜持國以與人

自後缺位

玄宗時宰相蕭嵩加中書令自張說為中書令後缺此位四年嵩得之常帶河東節度使

掌文誥職

張九齡一代詞宗為中書令引韋陟為中書舍人與孫逖梁涉對掌文誥時人以為美談

有刀筆才

吳薛瑩條例吳事曰胡中意性調美心識解暢有刀筆才閉於時事為中書令雖不能匡矯亦自守不能苟求容媚

奪我鳳池

荀勗自中書監為尚書令入賀之乃發惠曰奪我鳳凰池何賀之有

指謂雞樹

劉放孫資共典樞要夏侯叡曹肇心內不平殿中有雞棲樹二人相謂此亦能幾指謂放資也

命停嚴鼓

太宗車駕征遼中書令岑文本卒帝親臨視撫之流涕其夕帝

聞嚴鼓三聲曰文本殞逝情深惻怛今宵夜警所不忍聞命停

索焚表章

馬周為中書令臨終索陳事表章帙手自焚之慨然曰以官案

彰君之過求身後之名吾弗為也

身為安危

郭子儀為中書令二十四考以身為天下安危言行錄

請言優劣

唐開元二年紫微令姚崇奏紫微舍人六員每議事請舍人同發狀凡事有是非理均與奪人心既異所見或殊抑使雷同情有不可盡臣以為執見不同者望請別作連本狀同奏若狀語交牙恐煩聖思臣既見官長望於兩狀後更言一理優劣聽進止



則人各盡能官無留事勅曰可

開國舊勳

宋趙普端拱初三入相稱疾上表致仕以普為西京留守河南尹加中書令懇辭再四太宗賜手詔曰開國舊勳惟卿一人而已不同他等毋即固避

台樞令德

王且罷相薨翰林學士承旨李淮等奏議曰太尉王且踐歷台樞將二十載紀律用張方夏咸服諄然令德洽乎民瞻贈太尉中書令

古今文集

雜著

韓通贈中書令制

劉敞

易姓受命王者所以徇至公臨難不苟人臣所以明大節具官定交霸府委質前朝荷戈共歷於艱貞錫壤迭分於戎律朕以三靈睽祐百姓樂推言念元勳方疇異渥蒼黃遇害良用撫然追升浴鳳之池式表潛龍之舊

新編古今事文類聚新集卷之五

事文類聚新集

卷之五

十五

新編古今事文類聚新集卷之六  
一五糸

新編古今事文類聚新集卷之六  
南江 富大用 時可 編  
金陵 唐富春 子和 刊

新編古今事文類聚新集卷之六

南江 富大用 時可 編

金陵 唐富春 子和 刊

都省部

左右丞相

歷代沿革 漢帝得六相而天地治 堯以舜 舜以禹 禹以皋陶 皋陶以伊尹 伊尹居右 仲虺居左 高宗得傅 說 爰立作相 置諸左右 周召公為保 周公為師 相成王為左 右 秦悼武二年始置丞相 官丞奉相助也 昭襄始以樗里疾 甘茂為左右丞相 漢高帝初置丞相 十一年更名相 國孝 惠高后置左右丞相 文帝即位 周勃為右丞相 位第一 陳平

事類彙編新集 卷之六

為左丞相位第一勅免平專為丞相武帝用劉屈氂為左丞相分官屬為兩府唐其右以待四方之選哀帝元壽二年更名大司徒東京不復置至獻帝建安十二年復置魏黃初元年改為司徒文帝復置中書監令並掌機密自是中書多為樞機之任後置大丞相第十品又有相國晉罷丞相復司徒永昌元年罷司徒并丞相後或有相國或丞相省置無常而中書監令常管機要多為宰相之任宋孝武以義宣為丞相而司徒府如故齊以丞相為贈官梁罷相國置丞相置司徒陳又置相國位丞相上並為贈官魏晉以來宰相但以他官參掌機密或委知政事無有常官其相國丞相或為贈官或闕不置其真為宰相者不居此官後周置大冢宰其後亦置

左右丞相及楊堅為大丞相遂罷左右丞相隋有內史納言是為宰相亦有他官參與焉唐世宰相名尤不正初以三省長官中書令侍中尚書令共議朝政此丞相職也其後以太宗嘗為尚書令臣下避不敢居其職由是僕射為尚書省長官與侍中中書令號為宰相品位既崇不欲輕授嘗以他官居宰相而假以他官如同中書門下二品及平章事知政事參知機務參與政事及平章軍國重事之名是也武后龍朔元年改侍中為左相中書令為右相尚書僕射為文昌後復改易宋沿唐制以三公至列曹侍郎同平章事為宰相神宗新官制於三省置侍中中書尚書一令虛而不除以尚書左右僕射兼門下中書侍郎為兩相然中書揆而議之門下審

而復之尚書承而行之則是首相不復與朝廷議論矣元祐  
 初司馬公相乃請令三省合班奏事分省治事紹聖以後皆  
 因之時議者謂門下相凡事既同進呈則不應自駁已行之  
 命是省審之職可廢也政和中蔡京以太師總領三省號公  
 相乃廢尚書令改待中中書令為左輔右弼亦虛而不除改  
 左右僕射為太宰少宰仍兼兩省侍郎靖康中何文煊將拜  
 相乃先乞復太少宰為僕射吳正仲當制請更為丞相不從  
 建炎三年呂元直初相議者請併三省為一於是元直解中  
 書侍郎改同中書門下平章事乾道七年十二月詔改尚書  
 左右僕射為左右丞相元置左右丞相位在尚書令之下  
 平章政事之上

羣書要語咨四岳有能奮庸熙帝之載使宅百揆亮采惠疇書

舜典納於百揆百揆時敘同上允釐百工庶績咸熙帝曰疇咨

若時登庸同上帝曰臣作朕股肱耳目益稷乃歌曰股肱喜哉

元首起哉臯陶拜手稽首乃賡載歌曰元首明哉股肱良哉庶

事康哉同上實維阿衡實左右商王長發夢帝賚予良弼以代

予言乃審厥象俾以形旁求于天下說築傅巖之野惟自爰立

作相置諸左右若濟巨川用汝作舟楫若歲大旱用汝作霖雨

說命肅肅王命仲山甫將之邦國若否仲山甫明之丞民王命

仲山甫式是百辟王躬是保出納王命王之喉舌衮職有闕惟

仲山甫補之並同上理百官而察萬民平邦國而和天下楊盈

川集登明選公雜進巧拙紆餘為妍卓犖為傑校短量長惟器

是適者宰相之友也韓進學解宰相所以代天者也輔贊彌縫

而藏諸用使斯人由而不知非明哲曷臻是歟唐房杜贊當左

輔右弼之寄總代天理物之名典領百僚陶融景化唐代宗大

曆二年詔九功不敘咨爾緝熙五品不時咨爾寅亮必廣大其

志無瞰察為公常其道以秉彝裕其體以臨下唐李絳制位愈

高而士愈戴祿愈厚而人愈懷唐元稹加階制從容昂位光贊

太猷元冕赤鳥在帝左右又云推忠導善達四方之志弘往納

來成天下之務杜佑碑武明七德文洽九歌棟才斯全鼎味以

適呂蒙正集宰相者上熙陛下履壽之恩下遂羣生性命之理

以正百度以和四時韓文啓黃扉而燮五緯躡青帷而調四序

孔稚圭為王敬則議司空表天方資乎人具瞻爾張弘靖制

詩句絳灌歸衡宰后漢鄴炎詩皇佐揚天惠四時無交兵曹子

建一氣轉洪鈞杜大厦須異才廊廟非庸器榮公鼎軸老京

幹力健屈韓文公貴相山瞻峻清文玉絕瑕同上稷契光虞夏

伊呂翼商周南史王儉少有宰相志材館經春瑞氣浮當時曾

約相車遊白樂天平生五色線願補舜衣裳杜牧早歲天教作

霖雨明時帝用補龍山王建上張相公終當持一筆再入福蒼

生劉夢得送令狐相公有官居禹禹無地起樓臺魏野上寇萊

公一戰文場拔趙旗便調金鼎佐無為王仁裕上傳相國王鼎

升黃閣金童謁紫宸任希古今朝靜聽丹禁漏尚疑身在玉堂

中歐詩但令端委坐廟堂北狄西戎談笑了坡詩不羞老圃秋

容淡且看寒花晚節香韓魏公詩舜舉十六相身尊道何高杜

子美詩 吾愛房與杜 魁然真宰輔 黃閣二十年 清風一萬古 唐

皮日休 左轄頽虛位 今年得舊儒 相門韋氏在 經術漢臣須 杜

霖甫思賢佐 丹青憶老臣 應圖求後馬 驚代得麒麟 沙汰江湖

濁調和鼎鼎新 杜 十年紫殿掌洪鈞 出入三朝一品身 文帝寵

深陪雉尾 武皇恩厚宴龍津 李德裕詩

古今事實

黃閣朱門

鄭玄云 朱門洞啓 當陽之正色 三公與天子禮秩相亞 故黃其

閣以示謙 不敢斥天子疑是漢舊制也 又漢舊儀丞相聽事閣

曰黃閣

金印紫綬

漢丞相金印紫綬 董扉黑幡 所以異車服於百辟也 百官制

丞相相國皆秦官 金印紫綬 掌丞天子 助理萬機 同上 又天子

之相號為丞相 黃金印而尊無敵 秩加二千石之上 賈誼新書

柱石之臣

丞相王商 國家之柱石 臣也 其人守正不詘節 前元后傳 又宰

相 國家柱石 不可不強 吳陸凱傳

棟梁之用

隋大業中 高孝基謂之曰 公有應變之才 當為棟梁之用 又宰

相之門 豫章枯栢 雖小已有棟梁之器 南史陸凱傳

有宰相器

何武初為郡吏時 太守何壽知武有宰相器 前本傳 又寇恂明

事 文類集新集 卷之六

經行修名重朝廷所得秩俸厚施朋友及從吏常曰吾因士大夫以致此可獨享之乎時人歸其長者謂其有宰相器又孟康薦崔琳曰切見司隸崔琳牧守州郡所在而治及為分司萬里肅齊誠台輔之妙器衮職之良材後崔琳傳

有宰相體

後朱浮論吳起與田文論功不及者二朱買臣難公孫弘十策弘不得其一終之田文相魏公孫寧漢誠知宰相自有體也

五龍文曰

狄仁傑蒙耻奮忠以權大謀引張柬之等卒復唐室功蓋一時而人不及知故呂溫頌之曰取日虞淵洗光咸池潛授五龍夾日以飛世以為知言本傳

一柱承天

姚崇與張說有隙崇次謂其子曰我次張說來弔爾以我平日寶玩畫列于前如說屬目即舉以獻之就問其求神道碑纒得即模刻以示外此人見遲稍緩即悔彼不顧則吾族無噍類矣子如其言說來果屬目稱去後即以獻之遂求所為文說許之故其碑曰一柱承天高明之位列四時成歲享壽之功深後說悔來索則碑已模刻矣說歎曰次姚崇猶能笑生張說後譖不行唐紀

論功第一

漢高祖五年論功行封上以蕭何功最盛先封為鄴侯功臣皆曰蕭何未嘗有汗馬之勞徒持文墨議論又論位次皆曰曹參

身被七十創攻城畧地功最多且第一鄂千秋曰曹參野戰畧地之功此特一時之事耳漢與楚相守滎陽數年軍無見糧蕭何轉漕關中給食不之全關中以待陛下此萬世之功也今雖無參等百數何缺於漢奈何以一旦之功而加萬世之功哉蕭何當第一曹參次之

人物第一

唐李揆同平童事帝曰卿門地人物文學皆當世第一信朝廷之羽儀乎本傳

一代冢臣

蕭何曹參皆起秦刀筆吏碌碌未有奇節漢興依日月之末光位冠群公為一代冢臣蕭曹本贊

一代偉人

姚狄蘇宋皆一代偉人或三入相再入相未有不义於其事能成令名焉柳氏家學文

漢室伊周

周勃登輔佐正國家難誅諸呂立孝文為漢室伊周前周勃傳

江左夷吾

晉桓彝傳王道為丞相彝見導極談世事還謂周凱曰向見江左管夷吾無復憂矣

蕭曹丙魏

近觀漢相高祖開基蕭曹為冠孝宣中興丙魏有聲丙吉贊

房杜姚宋

房杜姚宋



蕭何薨曹參聞之告舍人曰趣治行吾且入相使者果召參參代何為相事無所變更遵何之約束百姓歌之曰蕭何為法講若畫一曹參代之守而勿失載其清靜民以寧一本傳較一

蕭曹畫一

丙魏相濟  
漢魏相為相丙吉代之相嚴毅吉能濟以寬同心為政上皆重之

謝安風流

王儉曰江左風流宰相惟有謝安蓋自况也南史

嘉貞風操

初天兵使張嘉貞入朝或告其反按無狀帝令坐告者嘉貞辭曰國之重兵利器皆在邊今告者一不當即罪之恐塞言路天子以為忠且許以相及宋璟罷帝欲果用嘉貞而忘其名詔韋抗曰朕常記其風操今為北方大將張姓而復名因閱表疏遂得其名即為中書侍郎同平章事本傳

不對錢穀

周勃為右丞相上問勃一歲決獄幾何勃謝曰不知問錢穀一歲出入幾何又謝不知上問陳平曰各有主者上曰君主何事

日宰相者上佐天子理陰陽順四時下遂萬物之宜外鎮四夷諸侯內撫百姓使卿大夫各任其職王陵傳

不問關傷

丙吉出逢羣鬪者死傷橫道吉過之不問前行逢人逐牛牛喘吐舌使騎問逐牛行幾里矣掾吏謂前後失問吉曰民鬪傷京兆尹職當禁捕宰相不親小事非當於道路問也方春牛喘此時氣失節恐有所傷三公典調陰陽職當憂是以問之掾吏乃服以吉為知大體魏相傳

遜直濟文

太宗定禍亂而房杜不言功王魏善諫而房杜遜以直英衛善兵而房杜濟以文房杜贊

應變守文

姚崇善應變以成天下之務宋璟善守文以持天下之正天所以佐唐使中興也姚崇贊

同管朝政

如晦與元齡同管朝政引士賢者下不肖咸得其職當時浩然歸望房杜贊

不問訟牒

太宗謂房元齡曰公為僕射當廣朕耳目助訪賢才比閱訟牒日數百豈暇求人哉乃勅細務屬左右丞大事關僕射房元齡傳

興仆植僵

太宗用元齡如晦於大亂之後紀綱彫弛而能興仆植僵使號

令典刑燦然房杜贊不全雖數百年猶蒙其功然求所以致之之蹟

速不可見房杜贊

唐蘇頌與宋璟同當國相得歡甚璟曰吾與蘇氏父子同為宰相僕射長厚自是國器若獻可替否事至即斷畫公不顧私則今丞相過之通鑑

不負天子

陸贄為相所言皆拂帝短或規其太過對曰吾上不負天子下不負所學唐本傳

總領眾職

前魏相字弱翁宣帝即位遂為丞相帝始親萬機厲精為治練

羣臣核名實而相總領眾職甚稱上意本傳

開誠布公

蜀先主即帝位策亮為丞相曰丞相其輔朕之闕助宣重光以照明天下評曰亮之為國也撫百姓示儀軌約官職從權制開誠心布公道可謂識治之良材諸葛亮傳

同心濟謀

唐杜如晦方為相時天下新定臺閣制度憲物率二人討裁每議事帝所如晦長於斷而元齡善謀二人深相知故同心濟謀以佐佑帝故當世語良相必曰房杜本傳

憂邊思職

前丙吉代魏相為丞相吉馭吏出見驛騎馳赤白囊馭吏隨至

公車知虜入雲中吏歸白狀召東曹案邊長吏科瑣條其人  
詔問虜所入郡邑吉具對見謂憂邊思職本傳

薦賢助國

李吉甫執政謂裴坦曰比日人物吾憐不及知君精鑒謂我言  
之坦即崖略疏二十許人吉甫籍以薦于朝天下稱得人薦賢  
助國宰相之職也

開閣延賢

公孫弘既相於是起客館開東閣以延賢人一日欽賢館以待  
大賢次日翹材館以待大材次日接士館以待國士其有德任  
毗贊佐理陰陽者處欽賢之館其有材堪九列將軍中二千石  
者居翹材之館其一介之善一方之藝者居接士之館躬自菲

薄俸祿皆以給之西京雜記

起家薦人

田蚡以肺腑為相起家薦人或至二千石權移主上本傳

為真宰相

隋高穎有文武之大畧明達政務朝野推服議者以為真宰相  
本傳又上謂魏相真漢相識兵略達時令文中子又王商有威  
重容貌絕人單于來朝商坐未央廷中單于前拜謁商離席與  
言單于仰視商貌大畏之遷延却退天子聞而歎曰真漢相矣  
為救時相

唐姚崇在告政事委積元宗謂盧懷謹曰朕以天下事委崇以  
卿坐鎮雅俗耳崇出須臾裁決俱盡顧謂齊澣曰余為相可比

何人未對崇曰何如管晏漸曰管晏之法雖不能施於後猶終其身公所為法隨復更之祗可謂救時相崇曰救時相豈易得哉

以春秋相

自公孫弘以春秋之義繩臣下取宰相前食貨志

以明經相

韋賢為丞相必子玄成復以明經歷位至宰相故鄒魯諺曰遺子黃金滿籩不如教子一經本傳

布衣登相

漢制常以刻侯為相唯公孫弘布衣登相位武帝乃封為平津侯其後為故事至丞相而封自弘始通典

宗室進相

唐宰相以宗室進者九人林甫幾亡天下李程和柔在位無所發明其餘皆以材稱職號為賢宰相唐贊

一日台司

唐王徽為相只一日中書五年二月除昭義節度徽上表乞免詞曰六年內署雖叨捧日之榮一日台司未展致君之懇南部新書

一歲至相

唐李訓起流人一歲而至宰相

二暮至相

張鎬起布衣二暮而至宰相

十年至相

李絳十年之間位至宰相

八十為相

張東之為相年且八十矣

二十三年

房元齡以盛德居相位二十三年

二十四考

郭子儀校中書令二十四考

為兩朝相

隋高穎事文煬兩朝有文武大略執政將二十年朝野推服論者謂真宰相

再升三入

唐宰相再入者長孫無忌狄仁傑李吉甫三入者劉蕡張延

賞鄭畋四入者韋巨源姚元崇韋安石五入者蕭瑀裴度職源

又宋瑒謝表云再升台座三入冢司

十拜四登

裴度十拜相詔四登師壇除平章事制

父子至相

前漢平雷傳云漢興惟韋平父子至宰相又唐戴胄子至德父子繼為相

兄弟並相

卞粹以清辨兄弟六人並登宰輔世稱卞氏六龍

入如父年

唐李吉甫年五十一。出鎮淮南五十四。復相。今德裕自鎮南外入相。一如父之年。

八葉皆相

唐蕭瑀傳自瑀逮遇凡八葉皆宰相。名德相望與唐盛衰。世家之盛古未有也。

繼踵皆相

後楊震論延光之間震為上相抗直方以臨權柱光公道而後聲名可謂懷王臣之節識所在之體矣。遂累葉載德繼踵宰相。信哉先世韋平方之茂矣。贊曰楊氏載德乃世柱國。

九十八族

唐宰相三百六十九人九十八族。其盛有如此者。

輩行不名

陸贄以才幸天子常以輩行呼而不名。

尊任不名

李吉甫還秉政入對延英凡五刻罷帝尊任之官而不名。

詔賜堂封

唐源乾曜同紫微黃門平章事帝詔中書門下共食實戶二百堂封自此始。並同上。

詔給堂餐

唐開平詔丞相尊位而堂厨未給無餐錢其令日食萬錢之半。

賜白羽扇

續通

典

事文類聚新集 卷之六 十四

張九齡在位。因帝賜白羽扇。乃獻賦。末自况曰。苟效用之得所。雖殺身而何念。本傳

賜熟金銘

鍾繇魏國初建拜相國文帝在東宮賜繇五熟金銘曰於赫有魏作漢藩輔厥相惟鍾實幹心膂靖恭夙夜匪違安處百僚師師三國志本傳

賜勅表直

宋璟為宰相朝野人心歸美焉時春御宴帝以所用金勅令內臣賜璟雖受所賜莫知其由帝曰非賜汝金蓋賜卿筋以表卿直也開元遺事

賜酒賞言

李吉甫用盛贊天子德憲宗欣然絳曰今日西戎內訌烽燧相接誠陛下焦心求濟時之畧渠便高枕而臥哉帝入謂左右曰絳言骨鯁真宰相也遣使者賜醪醑酒唐李絳傳

拜相沙堤

唐故事凡拜相之後禮絕班行府縣載沙填路自私第至子城東街名曰沙堤

朝會火城

每元日冬至大朝會百官已集而宰相方至珂傘列燭多至數百炬謂以火城宰相火城至則衆皆滅燭以避之李肇國史補

金甌覆客

唐元宗命相皆先御書其名案上會太子入侍上舉金甌覆其



名而告之曰此宰相名也汝知其誰耶射中賜卮酒肅宗曰非  
崔琳盧從願乎上曰然通鑑

紗籠護身

唐下者胡蕭生等下甚驗李藩嘗問生生日貴人也在紗籠中  
李問所由終不復言後有新羅生言宰相冥司必潛以紗籠護  
之恐為異物所擾也唐紀

以銀為信

鄴侯傳代宗欲相泌元載忌之帝不得已出泌約曰後召當以  
銀為信忽除銀青光祿大夫泌知載敗已且相矣未幾果然  
諺稱以待

唐制政事堂不接客自元載為相中人傳詔者引升堂置榻待

之李峴去即敕吏撤去唐志

去卿失左右手

房元齡為相十五年以權寵隆極累表辭位帝遣吏謂曰遜誠  
美德也國家相眷賴久一日去卿如亡左右手本傳

去卿如斷一臂

高宗幸洛陽詔薛振與太子居守上曰朕之留卿若去一日若  
斷一臂關西重事悉以委卿本傳

槐枝應和

相國李石河中永樂有宅庭槐一本抽三枝直堂舍屋脊一枝  
不及相國同堂兄弟三人曰石曰程皆登宰執惟福一人歷七  
鎮使相

槐音入相

唐尚書省南門有古槐，音陰，至廣。相傳夜深聞絲竹之音，音中即有人相者，俗謂之音聲木。見因語錄

焚香擇相

唐廢帝欲擇宰相，問於左右，皆言盧文紀及姚顛有人望。廢帝因恐書清望官，內琉璃甕中，夜焚香，祝天以筮揆之，首得文紀，欣然相之。五代史

經函龍骨

僕射裴遵慶母皇甫氏，少時常持經經函，中有小珊瑚樹，異時忽有小龍骨一具，立於側，時人以為裴氏祥。上元中，遵慶遂居宰輔云。廣異記

宰相金榜

崔昭暴死，復生云：見冥間列榜，備書人間姓名，將相列金榜，其次列銀榜，州縣並列長，鐵榜曉之。唐書

夢神授筆

五代唐末帝時，馬裔孫赴闕宿，邏府其地有神祠，夜夢神手授一筆，及為翰林學士，裔孫以為契夢筆之兆，洎入中書，上政事堂，吏奉一筆如夢中所授者。太平廣記

夢錦半臂

正元中，相國竇參為御史中丞，嘗一夕夢德宗君對於便殿，以錦半臂賜之，默念曰：臂者庇也，大邑所以庇吾身也。今夢半臂者，豈上以某叨居顯位，將給半祿，俾我致政乎？客有解曰：半臂

者被股肱之衣也。今公夢天子賜之。豈非上將以股肱之位而委公平。明日果拜中書侍郎平章事。出宣帝志

夢金字牌

唐杜相鵬舉父夢有所之見一太碑云是宰相碑也。已作者金填其字未作者列名于上。杜問曰有杜家兒否。曰有。任自看之。記得姓下其鳥偏傍曳脚而忘其字。乃名鵬舉。鵬舉生鴻漸而名字亦前定矣。嘉話錄

一言寤主

漢田千秋無他材能術業。特以一言寤主。旬月取宰相。世未有也。

十事要君

姚崇以十事要說天子。而後輔政。顧不偉哉。姚崇傳贊

懷慎伴食

盧懷慎開元中遷黃門監。與紫微令姚崇對掌機密。懷慎自以吏道不及崇。每事皆推讓之。時人謂之伴食宰相。

味道模稜

蘇味道前後居相位數年。不能有所發明。依違其間。苟度取容而已。嘗謂人曰。處事不欲決斷。明白若有錯誤。必貽咎譴。但模稜以持兩端。可矣。時人由是號為蘇模稜。

立本丹青

唐闡立本既輔政。但以俗材。應務無等。相器。姜恪以戰功擢左相。時人有語左相宣威沙漠。右相馳譽丹青。

妄男千秋

武帝征和三年以田千秋為丞相千秋無材能學術又無閑閱  
功勞特以一言寤意旬月取宰相世未有也後漢使至匈奴單  
于怪而問之曰聞漢初拜丞相以何用得之使者以上書言事  
故單于曰苟如是非用賢也妄一男子上書即得之矣本傳

歌後鄭五

鄭察每以詩誑託諷中人有誦之天子前者昭宗意其有所蘊  
未盡因有司上班簿署其側曰可禮部侍郎同中書門下平章  
事察不善詩其語多俳故使落調世共號鄭五歌後體至是省  
吏走其家上謁察笑曰諸君悞矣人皆不識字宰相亦不及我  
吏言不妄俄聞制詔下歎曰萬一然笑殺天下人既視事宗戚

詣慶搔首曰歌後鄭五作宰相事可知矣固讓不聽立朝侃然  
無復故態

指鹿為馬

李斯既死趙高為丞相事無大小輒決於高高欲為亂恐群臣  
不聽乃先設驗持鹿獻二世曰馬也二世笑曰丞相誤邪謂鹿  
為馬問左右左右或默或言馬以阿順趙高或言鹿者高因陰  
中以法後羣臣皆畏趙高遂有望夷之禍

牽大逐鬼

秦用李斯之計二十餘年竟并天下尊秦王為皇帝以斯為丞  
相及二世即位聽趙高之譖使高按斯下獄榜掠千餘不勝痛  
自誣服斯自負於國有功實無反心乃從獄中上書趙高使吏

事類彙編卷之六 十九  
棄去弗奏於是具斯五刑論腰斬咸陽市斯出獄與其中子俱  
執顧謂子曰吾與汝復牽黃犬俱出上蒸東門逐狡兔可得乎  
父子相哭而曳三族

味道春雪

唐武后時三月大雨雪蘇味道以為瑞率羣臣入賀王求禮曰  
宰相調燮陰陽而季春雨雪乃災也果以為瑞則冬月雷渠為  
瑞雷耶

景佺秋花

唐武后嘗季秋以梨花示宰相以為祥衆賀杜景佺曰陰陽不  
相奪倫瀆即為災今草木黃落而木復花瀆陰陽也恐陛下布  
德施令有所虧茶臣位宰相助天造物而不和臣之咎也頓首

請罪武后曰此真宰相也

嘆穢亡鏡

太宗嘗謂侍臣曰夫以銅為鏡可以正衣冠以古為鏡可以知  
興替以人為鏡可以明得失朕嘗保此三鏡以防已過今魏徵  
傾逝一鏡亡矣

命停嚴鼓

太宗擬伐遼時岑文本為中書令凡所籌度一以委之文本受  
委既深神情頓竭言辭舉措頗異平常太宗見而憂之謂左右  
曰文本與我同行恐不與我同返及至幽州遇暴疾而終其夕  
太宗聞嚴鼓之聲曰文本殞逝情深測阻今宵夜警所不忍聞  
命停之





